


春融堂集

和16
890
14



春融堂集卷四十九

青浦 王 利 德甫

記三

畢雨稼行旅圖記

右圖一卷畢雨稼先生狀其旅行作也先生少以詩詞名于
 時秀水朱竹垞檢討華亭高查客上舍皆與為交游曝書亭
 集有勸畢子飲酒及飲二十杯腹痛詩又章豈績有題畢
 積畫竹卷載積先生兄也先生工書得顏魯公李北海行
 法余嘗見其詩十餘篇及詠梅竹影諸詞風格亦在竹垞
 客間今求之士大夫家已不可復得先生額微赤面目秀
 如畫此正其四十餘歲像也蓋嘗兩游京師一適晉再入閩
 因有是作嗟夫人固有跼伏鄉里讀山經地志賢昔人游記



所狀山水奇崛幽麗恨不宿春糧負襍被徜徉其間以爲
人生當作萬里游何苦低首甕牖以自悶抑其意氣余曩者
所見亦然及甲戌入燕自燕入齊踐鄒嶧涉汶濟徑乎泰岱
之麓車輪歷碌軒輊黃埃坱起集眉目間如土偶日炙背揮
汗雨下煩渴不得飲始喟然大息知行路之難今圖中村莊
罨靄榆柳翳如溪山悉清遠可喜意覽者將深有樂乎此而
孰知先生蹇連不得志終登頓于車馬間以老也可不嘆哉
先生名大生予同里人無子嗣一女適葛氏氏生一女爲予
再從子棟婦是圖葛氏所藏因來索余記余悲先生窮老以
歿僅六十餘年而當世罕有知其名者久之恐遂湮佚因舉
其生平大畧附著于斯記圖中僦從四騾二馬三鈴馱五絹
長三尺二寸高九寸

汪文端公松泉圖記

少師汪文端公以文章道德受

聖主不世之知某鄉試座師夢午塘玉芥子兩先生皆出公
門下及在軍機處與今副憲君同直是以知公文章德望益
詳公於乾隆壬申侍直之次

皇上親灑宸翰書松泉二字賜之公因取以自號又屬董
文敏公邦達及李太常世倬蘭陵布衣張洽圖之寫像於其
上蓋一以侈君賜之隆一以表生平所尚也或謂公身名
在日月之表聞望在斗杓之地而顧取於荒蹊寂莫樵澆無
人之境聽松風而友泉石以自附於高人逸士之爲可居
吾聞古君子之自處也窮居而不損大行而不加謝
定危疑而寢處有山澤間儀徐簡肅參掌衡石謚心

欲以種樹穿池少寄情賞至如裴晉公之綠野司馬溫公獨樂其旨寧有殊哉公生於天都清曠之區長於西泠澗之地一旦蒙上之賜而悠然發松石間意斯不意歟仁知之好深矣應制視草政事填委而蕭閒沖淡無累所謂人視朱門如游蓬戶者雖境無松泉無適非松泉致也而又何疑焉祖以甲戌應禮部試芥子先生詩以訓勉之者甚至及蒙恩賜中書舍人午塘先生生平所學言於公將使預軍機之直比至都而公展公之圖仰公之儀像其從容和厚文章道德之氣滂溢於楮墨而計騎箕之歲忽忽已三十七年風範如新哲人久萎可勝悼歎歟因副憲君之屬相與泣然而書其後云

陶然亭雅集圖記

乾隆丁酉六月十一日徐子尚之錢子獻之王子敦初胡子元謹金子振之張子鄂樓宴朱編修竹君及余於城西陶然亭亭既高敞諸子譚藝道古聽之灑然時方暑若不知炎歊之被于體也日暮雷雨將作益涼于是分體作詩鄂樓又令善畫者繪以爲圖古來嘉會多矣獨晉之蘭亭宋之西園好事者爲圖以傳天下世說右軍聞人以蘭亭集序方金谷詩序又以已敵石崇甚有欣色考崇父子以劫盜富極園林聲伎飲饌之盛性淫而好殺又與潘岳輩諂事賈謚有志節者方羞與爲伍比崇適足爲恥奚以喜爲右軍度不出此殆傳之者妄爾然蘭亭二十六人安石與公子猷之外不甚著聞實不足比于東坡諸君子好古多聞博學絕俗可爲百世師也傳不以地以圖在人惟諸子勉之爾尚之名書受武進人

元謹名量長洲人鄂樓名彤烏程人皆余門人獻之名玷嘉定人敦初名復秀水人振之名翀仁和人余同年之子也

授經圖記

同年韋君約軒出示授經圖一卷中依石而坐容色睟然是爲君尊人鐵夫先生其垂髻倚側而奉書者則君也蓋君家傳經已九世矣是時君年方十四爾于是君屬余以文記之余維孔子沒兩漢經師莫不各仞其家法臨以天子公卿之問難莫能奪也其一家父子祖孫相授受者尤衆易則汝陽袁氏會稽虞氏皆五世書則魯夏侯氏五世千乘歐陽氏八世見于兩漢書暨經典釋文不可勝紀也蓋古之學者讀易如無詩讀書如無春秋又于一經中顛守一說歷數世而不變是以立志也定而爲說也博且精後世藉以取科第往往

一人之身促數更易其所誦習又以爲姑不悖于制義已爾故經術益衰卒于弁陋荒蕪而不可詰也豈不宜哉先是君嘗繪圖勗其子孝廉君俾余題詩于左余爲深著荒蕪弁陋之弊務斲所爲博且精者今復閱先生是圖則韋氏之窮經猶有兩漢經師之遺則歟先生一老貢生晚年洊歷學官不以冗長自廢行事卓卓非家世窮經之效歟韋氏九房在唐最爲著姓多以文章勲業聞迄于貞元元和間彤及公肅又以習禮見重於容家觀其辨祔祭議寢園兩漢經師不是過也君承先生窮經之教迄今幾五十年其間出典行省入直館閣旣已有聞于世矣而孝廉君復以通經繩祖武將見族姓之盛媿于唐而家法之傳上擬兩漢不亦休歟圖長三尺五寸博一尺高梧深柳老屋數椽稱其爲經師所居云

大樹山房圖記

大樹山房冊子蓋余君元亭圖其故居也君以名孝廉宦游雲南馳驟功名者二十餘年已而官蜀中以憂回里去年中丞譚公聘主五華書院君著書窮經之外未嘗一日忘故鄉於大樹尤切故爲圖以表其志云嗚呼古以大樹稱者多矣姑不具論曩時緬甸跳梁大兵進討大學士傅公爲經畧公見騰越人家竹樹蒼翠叢密因除地築室其下名曰大樹園余作詩紀之蓋時君綜理軍須所親覩者迄今十八年傅公薨逝久矣園亦化爲榛莽蓋世事白衣蒼狗不可把翫如此孰與君之大樹吟風雨傲霜雪樹與室久而無恙乎曲轅櫟社之木以爲器則速毀以爲門戶則液構以爲柱則蠹無所可用是以其大百圍而絜之可以蔽牛商邱之木拏曲不

可爲棟梁啗其葉則爛嗅則使人狂醒是以結駟千乘隱將芘其所賴若君之昔從事於軍也兵數千隊牛馬數萬頭糧餉數十萬石徐而晰之分而治之秩然井然各獲其所俾經畧倚如左右手可謂不材無用者乎而君終不欲以自炫其材是君之宦游直寄焉以爲不知已者詬厲已矣今君辭講席歸休乎故居彷徨乎無何有之鄉廣莫之野逍遙乎寢臥其下斯樹也當如楚南之冥靈上古之大椿以千歲爲春秋彼曲轅商邱何足與倫比歟余別君十餘年復來於此年益衰此樹婆娑生意盡矣見舊時草木輒有攀條流涕之感蓋庾子山所謂火入空心膏流斷節者也故覽君之圖益有感焉雖然君爲政所至有惠聲君能忘世世未能忘君其又將以大樹爲甘棠也夫

游珍珠泉記

濟南府治爲濟水所經濟性湫而流抵巇則輒噴涌以上人斬木剝其首杙諸土才三四寸許拔而起之隨得泉泉瑩然至清蓋地皆沙也以故不爲泥所汨然未有若珍珠泉之奇泉在巡撫署廨前螿爲池方畝許周以石欄依欄矚之泉從沙際出忽聚忽散忽斷忽續忽急忽緩日映之大者爲珠小者爲璣皆自底以達于面瑟瑟然纍纍然亢倉子云蛻地之謂水蛻水之謂氣蛻氣之謂虛觀于茲泉也信是日雨新霽偕門人吳琦楊懷棟游焉移晷乃去濟南泉得名者凡十有四茲泉蓋稱最云

游龍泉記

余以己丑正月抵永昌適有幽憂之疾閉戶却掃鄙令奚君寅太邑令仲君鶴慶來告曰子曷不游龍泉泉在太保山之陽廣二百餘丈修倍之水瑩然見底其底布以沙沙往往作金色泉遇竅則升于水見水如千萬珠纍然散漫而上魚淦苻藻閒凡數百尾若行空中鱗之界鬣之紋皆得以一二數上爲屋三楹縮以版下可掉小舟通也屋之右爲橋宛轉以屬於池中之亭登亭以望則人烟之杳靄山嵐之層疊可覽而盡也楓楮檉柳雜植倚岸蓋吾自入滇而南未始見有如斯泉者余心躋其言會赴騰越不果游十二月師旋又閱月將還京師於是召朋侶挈酒榼往游焉至則水之澄泉之濫風景之幽異一如奚仲二君言泉一名易羅池稍西有龍神祠又有屋以祀自古忠義之士云

近華浦游宴記

乾隆庚寅春定邊右副將軍阿公謦服緬甸旋軍雲南省治將朝于京師會有旨命公綜覈軍實巡撫明公乃以暇日率其屬錢君受穀等餞公于近華浦浦爲滇池上游九十九峯水瀦焉以近五華山故名其廣數百頃烟水彌望繇浦而東有寺名明公於是置酒大合樂酒半登舟謳者隨之維以緋纜緣堤上下自午至夜二鼓乃罷賓僚懽洽隸卒飽飫氓庶闐溢喜踊二公皆樂甚翼日錢君屬爲之記惟緬甸劫衆阻兵弗靖六七載公以總督督軍事時餽饌十餘萬巨二三十驛弗絕男女任負顛踣則憂蜀黔之卒調戍邊徼瘴雨毒霧觸冒僵斃則憂進屯蠻暮軍士擔舟具跋涉泥淖他他藉藉則憂經畧渡江以西路險阨軍士多相失在後賊方挾孟養酋爲抗拒計且蒼蒲蠻岡閒有伏莽則憂賊柵官屯

守之我軍闕地道築礮臺舉烈火環攻未克下則憂茲者緬渠震動難竦函書丐死具告

天子威命永底南服烽燧不驚畊鑿如故公于此時听然引滿固宜古大臣撻伐功成其還朝有圭瓚秬鬯之錫其旋而有饒歌奏凱之樂吉甫之征伐獯狁也來歸自鎬飲御諸友然則公之燕衍於斯詎有好樂太康之戒歟仲山甫受命域東方自周京至齊其地僅千有餘里爲時亦非有積歲月之久而吉甫作頌乃云式邁其歸以慰其心說者謂賦政于外雖山甫之職而保王躬補袞闕尤其所亟吉甫知之故言歸以志慰今公夙以尚書領宿衛久掌機密身雖在外乃心罔不在王室適歸而入禁林固所夙夜以冀者明公茲餞益吉甫作頌之旨所以慰公心者至矣非獨釋憂而宣樂已

也既作記且仿昌黎泮州水門之例系之以詩其辭曰
祥柯之江導源昆明其瀕百頃近華以名公之來游言載其
旌以樂我樹藝以偃我甲兵一惟緬人弗虔惟逋逃是淵屢
討弗迪敢侵我邊我邊我田我契我屋奉
天子命作我戎旃如雷如霆如山如川壓此醜虜殄其樓船
因壘而降曰肆赦是宜二國恩既宣大師既旋滇之士伍
投刃歌舞滇之亞旅載筐及筥徹我南土惟蠻夷以無侮三
昔也陳師載渴載饑今也式燕孔惠孔時何以薦之羊臞熊
腴何以侑之考鼓吹竿岸有鷺鳧澤有菰蒲維暮之春雜花
如剪四二公顧之偕民以娛四緬之未寧其武是崇緬之來庭
保釐是庸克亂厥中克成厥終俾大蘇會覃及羗戎莫高匪
山莫浚匪池猗歟樂豈千載是思

游雞足山記

余二十年前讀藏經云摩訶迦葉於世尊入滅後持僧金黎
伽衣入大雞足山埃慈氏下生異之已讀周氏復俊記益慕
其境戊子入滇詢茲山所在言距雲南縣才三舍會軍事亟
不得往明年緬人降又明年正月從定邊右副將軍禮部尚
書阿公赴昆明會議善後事將還永昌撤兵私念矢是願已
二十年不可不償且雲南距山甚邇乃假以往二十日自昆
明行夕抵安寧州宿于進士段汝舟家庭有數石高五六寸
許瓏玲穿透皆可置懷袖二十一日抵祿豐晴二十二日抵
廣通微雨二十三日次呂合遇迤西道博君晰齋明諗以將
陟雞足山晰齋喜致書賓州牧屬備輿從二十四日抵普湖
二十五日辰刻抵小雲南是爲入山道乃折而西二十里經

雲南縣城出郭新柳初萋柔綠如圖畫菜花豆莢香遍塍隴人家門巷俱引山泉環之四面層崖疊嶺及暮紫翠萬狀抵梁王山元憲宗平雲南世祖封第五子填撫其地故往往有梁王跡焉宿古祠樓上大理守圖君桑阿檄邑令以廚傳以余方齋藜藿菽乳頗飽適二十六日行三十五里抵賓州城寥落居民僅數百家牧費君承祚吳江人救供具甚備與輿夫未集弗能行宿于書院點燈進酒如上元風景二十日行二十里抵牛井街飯于蕭公祠不審何神也後有許遜吳猛諸尊神像蓋江右人所建又六十里始抵山麓夾道松陰如幄巨泉自亭下叢石中奔薄而出合澗水下流過雪陰橋俗名河子孔志稱水從西洱河來又上數里有坊扁曰靈山一會又二里許對面峭壁間有瀑如匹練下注方池是晚

憩石淙寺借范承勳山志篝燈讀之窗外刁騷淒切疑爲夜雨詢之乃知山溜觸激及槲松數十本樛櫛摩戛作聲也二十八日晨起霧甚出寺里許漸開大覺寺僧招晨飯策馬過之寺甚幽寂方丈前小池纔二尺許篆烟泉從地噴出蓋泉自山半下注勢猛遏而激之奮迅上出乃成此如烟一縷高可丈餘裊裊拂松枝旋而墜如雨故一名雨花濟南釣突此此祇巖俗耳飯畢過西齋山茶盛開傍有姜思睿詩石姜監監察御史與僧幻空交空有墓志係瀉隆武二年兵部觀進進士曾高捷所謨出山門以北逕明柯坪十五里歷楊黼始始抵迦葉殿殿前爲臥雲橋殿後啓窗見插屏峯蓋山中諸寺之祖庭也自是而上亂石縱橫不復可騎策杖步行西爲兜率庵過鳳頭峯又西爲銅瓦寺山勢益峻削鑿壁出逕諺

名猢猻梯行人繚繞其間再上登四觀峯則絕頂矣頂有金頂寺前有金殿殿有鼎係僞永歷二年製庭中秋雪至春未融登寺後玉皇閣則西域雪山橫亘天半獨雲霧杳靄徐霞客所謂黃金佛塔不可指識也天風浩浩神魂肅然啜葑小憩而下至華首門仰跡插屏峯者石壁千仞直痕內刻象闔扉然卽尊者入定之所又數十仞上現觀自在菩薩像下有藥眼水及受記泉適番僧在此瞻禮見余掇轍香爲餽余解白絹答之白絹番名哈達番人尚白相見輒以爲祝故從其俗云折而下復至迦葉殿晚飯會華嚴寺僧亦遣其徒來迓遂往夕霏如兩嵐翠沾衣景物清嘉無出茲地右者覽寺後松雲峯裴裒久之會日未沒復趣游悉檀大殿所奉慈氏像端莊圓滿與三十二相不異其次補佛處也宜已登法雲閣

觀大藏經蓋天啓四年敕賜有僧某誓閱全藏不下閣者已五年矣昏黑還歸石淙山中大寺五石淙悉檀大覺華嚴傳衣一日游其四乃與僧約以明晨游傳衣二十九日飯於石淙畢出寺門指西南行松林下皆杜鵑也抵傳衣寺庭前山茶一樹花重臺朶以萬計殷紅眩目幹如藤皆晉晉然而俯僧人以木承之蔭十餘席出中門小池丈許紅魚數千頭游衍灑灑云下廣深不可測以是孕育者多遂次歷萬松庵圓通寺小雷音寺萬松正背松雲峯幽靚獨絕從此乃下山三里復過靈山一會回視插屏峯橫截天半喟戀不忍舍也晰齋書來道圖君已檣舟請渡洱海取道大理以歸謀于山僧謂洱海多大風弗可刻時日乃遵舊路午刻抵田院申刻抵牛井夕抵賓州二月初一日行二十五里至金雞村民居頗

盛過此爲五龍壩山山甚峻石嶠燒礪數武一折久之纔
二十里抵山均有猓獾聚落令從者拾薪作飯飯已循峭下
石勢如前復行四十里抵趙州宿初二日晨雨抵龍尾關雨
甚過天生橋洱海水數道從玉龍關噴出其最急者散如
霧并于澗轟鬥以下至合江鋪凡五十里皆雪浪也暮風
甚止一小樓擁爐乃臥初三日晨復雨抵漾濞晴經大覺
復雨遙望點蒼雪色及博南雲氣盪映心目過太平坡
行亥刻始抵黃連鋪有以黃柑南酒餉者把酒聽雨破柑嘗
之味酸甜似橙差大而圓滇人呼爲黃果云初四日辰刻次
天井舖戌刻抵永平夜雨簷聲竟夕初五日微霽山花橋抵
榔木河宿初六日抵永昌嗟乎余夢茲山久矣今乃于萬里
外籃輿筇杖往踐其巔頂顧不偉與抑固與山有宿緣與或

謂人特患無願願旣堅矣必獲所以遂是願者佛力果然與
豈以余之顛連危苦天姑以是慰余而使獲是大觀與昔蒙
氏據有六詔別封嶽爲五點蒼及高黎貢皆在焉此山不與
殆以佛祖所栖未敢儕諸秩祀則茲山之尊嚴超迥可想
得之也已余詣菩薩頂下禮大迦葉影山僧數千指爲余講
佛余作偈二千言庸以闡演靈蹟摘發奧異屬賓州牧費君
大書深刻於華首門崖下

雅州道中小記

距雅州府治四里聞水聲潺潺然蓋叩水也編竹爲筏浮水
面筏相接處以木巨之維紉纏如筏席五重焉行筏上水汪
然出馬蹏下竹間疏可以通水而履之若康莊法至善也巴
蜀之間渡水者率用竹故古謂之叩筏徐廣云筏竹索也余

聞汶川西北多索橋法絞竹爲綯穴山趾以貫首尾一橋凡束數十綯經于空中人行其間顛簸心目皆眩暈至有噫嘔者又松潘雜谷有溜索索亦裂竹絞焉兩厓植椿各二高卑各一西厓繫索高椿上則以其末曳東厓屬於椿之卑者其自東而西亦然剖竹爲瓦狀有渡者縛兩瓦合於索上又縛人於瓦上推之瓦循索自高以迄於卑抵岸側則解其縛以行他若財貨器用及嬰兒皆可用以渡渡者如激矢其下石如犬牙與波浪相戛摩而土人殊不爲意其奇詭險怪若此或云卽蜀都賦所云都盧尋橦者嗟夫徼外蠻獠所造作器用大率非中原所經見又聞打箭爐西章谷河夷人用犛牛皮紉於竹以爲船圍二丈餘徑約七尺容兩人渡船行枻枒亂石開水若噴雲篙師舉篙點之篙善委蛇屈曲無不如意否則觸石棱率以破敗淹沒云

其二

自雅州至小關山兩山皆壁立谿中石纍纍然若卵若棊若彈丸若缶瓶甕釜大者若舟蓋夏秋間瀑流怒漲挾石以下轟訇亂紛排擊抵蕩凡角圭鐫殺焉故其狀若此谿水落人爲道谿中水漲則從偏橋以行偏橋之制先鑿穴石壁上下二三丈復鑿穴以楛巨木木斜出杪與上壁穴平舉木橫上穴中復引其首綴於木杪勢平後固以繩或鐵或竹索兩木間則施駢木焉實土布以版如是始通人行秦中名曰棧道又名閣道楚黔皆有之惟蜀爲甚歲久繩稍弛率跛倚搖蕩又久者版木朽腐缺處俯見萬石林林石皆槍植劍矗輒背汗足痺澀不能舉馬蹈其隙顛踏行人墜萬仞下肢肌糜裂

以効若是者壁絕路斷處多有之故其地號至險予以十月四日過此兩甚遇橋朽腐必下馬以步其上窮崖欹嶂若騫若虎搏若熊蹲若豕立牛駭往往摩人頂木干草蔭左右蒙翳甚者若屋若障罨以雲霧晝冥晦有鳥焉嘯如嬰兒啼下與谿水淙潺相應和是谿也北流入

其三

越小關山行折而稍南兩益密橋之欹仄朽腐又如中騁而蹶者十五六蹶而傷若損者十二三予時時製控以行故得無恙嗟夫予騎行天下蓋萬餘里矣為最穩鸞輅將至地方有司除道刮泥淖理犖嶇隆而治之實以赤埴其平且直如砥然甲申春從將止舍與員外郎汪君承需竝而馳以馬蹶韁墜丁亥秋從

幸木蘭過博洛河屯在馬上指山色語形勢向背忽顛而下行者不知所以然也已丑從軍出銅壁關由野牛壩而蠻暮由蠻暮而新街而老官屯雨久泥淖沒馬腹淖下樹根絡叢石如網然其上藤之懸木之椅篋笏之蒙密又與頭目肩脊相觸礙險眎此倍之行數百里卒無顛仆患豈信工于騎哉坦途易忽險地易儆儆則無虞而忽必有失理也凡處險之道二在見險而能止若不可止受之以需需非怠緩之謂蓋敬慎也需之象故曰敬慎不敗嗟夫懼以始終其要无咎獨行路為然耶既抵館城城然猶有戒心因難燭書之

其四

繇大關山抵叩嶮山大象嶺凡五十餘里肩輿戛戛上密雨不已及嶺凝為雪輿人凌兢手足皆僵凍至一洞諸葛武鄉

侯祠也入旁室道人進粥糜啓西南牖雲霧雨雪晦霧掩塞
四顧無所見頃之自嶺下雪霽輿人云嶺北兩嶺南日蓋率
以爲常下嶺七十二盤始抵麓志云此九折坂爲王陽停馭
處然眎關山路較坦易古人且躊躇不于不敢輕蹈則如予
者以遺體行殆昧于道而不徑舟而不游之義其王陽之罪
人矣夫

木耳占記

山蜀最奇蜀之山西南徼最奇西南徼皆山也木耳占最奇
木耳占蓋沃日土司地自日隆關迤西山盤盤焉漸高及是
山斷石壁立千仞中豁十餘仞番民橋其上水從商角山來
轟激噴搏如雷霆如雪霰俛眎千仞下往往飛沫濺衿袖陰
寒中人毛髮皆竦而立過橋數百步又有壁焉色赭如鋒刃

如鋸齒攢而轟者如列戟齧而蝕蝕而殊者如朽木腐吸予
行天下遠矣所至皆古人所未至於滇循火燄山而南抵南
大金江還入虎踞關出騰衝蓋千有餘里則楊新都徐武功
屐齒所弗造也于蜀挽索橋越天舍斑斕諸山則李太白杜
子美陸務觀所詫歎怪偉絕異者不及萬分一也然皆未若
茲地之險且奇壬辰五月十八日子將適卡了至日隆關與
提督董君天弼語及之董君曰曷不作記饒諸壁且購石工
良易遂索敗紙書之後有過此者其亦將喜予之奇而悲予
之險也夫

橋東西皆有番寨甚堅寨中礮高十餘丈鎗火可及數百
武外上年冬董君自甲金達山潛出蒲松岡攻達圍克之
已絕木耳占後故番人委此去不然聚數十人斷橋以守

春融堂集卷四十九
兵雖衆未易踰也併鑿于壁諭後之勤遠畧者

美篤寺災記

距小金川番巢三里倚南山岡上有美篤寺蓋酋以居喇嘛喇嘛者華言番僧喇嘛種有二由宗喀巴達賴喇嘛班禪爾得尼下者謂黃教由後藏多爾濟下者謂紅教其言皆宗釋迦而紅教大率如長爪梵志迦葉火師之屬爲彼道中外道番會多尊信之故創寺爲五重宏壯雄麗翼以樓煩與內地阿蘭若等今年六月大軍自美諾歛兵出火其樓未燬十一月初四日收復美諾復燔之中夜火作其光若流虹其燄若撒沙烟燄若雲霧蔽暝星斗祝融燥怒神鬼焦爛百里之外番夷企踵呀駭歎驚白亥迄丑焚畢或問于予火曷爲而作曰心火也心動欲生欲動爭生爭怒不已因有刀兵之禍刀兵銳其口剗其上咸火象也故離爲戈兵爲甲冑刀兵格鬪之後繼之以火蕩爲冷烟寒灰靡有孑遺于是心之火之禍始熄楚之兵焚阿房漢之兵燒漸臺類此者于史以千百計故曰兵猶火也始于不自制其心之火遂延于人民寨落而佛氏剎宇隨之雖番夷之地其理有不易此者其可不怵然用此爲大誠歟或唯唯而退遂書之爲記

春融堂集卷四十九終

春融堂集卷五十

青浦 王 昶 德甫

釋 辭 贊 銘 哀辭 誄 祭文

釋盧橘

司馬相如上林賦盧橘夏熟應劭云伊尹書云箕山之東青
 鳥之所有盧橘夏熟晉灼云盧黑也是果不經見于世故徐
 堅初學記引張勃吳錄云建安郡中有橘冬月於樹上覆葉
 之至明年春夏色變青黑味尤絕美上林賦云盧橘蓋近是
 是亦疑其相近非定為必然也至唐庚李氏山園記則曰枇
 杷盧橘一也蘇軾初食荔支詩云南村諸楊北村盧白花青
 葉冬不枯垂黃綴紫烟雨裏特與荔支為先驅自註楊謂楊
 梅盧謂盧橘又云羅浮山下四時春盧橘楊梅次第新竟以

盧橘爲枇杷矣後如何景明詩云五月鮭魚已至燕荔支盧
橘未能先 本朝王士正尙書題畫枇杷詩云盧橘蒼蒼橫
幹起率宗唐氏蘇氏之說若陶九成朱翌並疑其誤而楊氏
慎云上林賦盧橘不言何物近指爲枇杷賦又有枇杷燃橘
之文不應重出駁之甚當然陶氏實以壺橘方以智通雅
以金橘海錄花木志實以給客橙又類出於一時臆度傳
而非古人之有明文者按應劭所本在伊尹書而漢書藝文
志無之惟載伊尹說二十七篇班固云其語淺薄似依托
且箕山趙岐云在嵩山下於唐屬洛州唐志志錫貢有苟杞
酸棗諸物獨不志盧橘豈以非珍品歟抑古有而今無或實
猶是而名已易歟蓋亦不足徵信焉矣廣州記盧橘皮厚氣
色大如柑酸多至夏熟土人呼爲盧橘是說也差爲得之

中峰水明樓辭

子友吳君企晉卜小築于中峰蓋在念亭開士精
舍之前下俯清池故名水明樓樓旣成相邀過宿
辭以落之

秋山兮岿巖秋聲兮調刁曰露下兮木葉以凋紛紅樹兮山
之椒有美一人兮侶松喬澹無爲而自得兮考邁軌以終朝
謂茲地之清淑兮建蕙櫜于溪坳懸八牕以洞達兮宛雲鶴
之能招俯清漣于淺渚兮佇圓魄于林梢方雜誦以無寐兮
忽波影之飄搖洵神清而骨冷兮矧鍾梵之迢遙漸香殘而
燭滅兮恍棲息于烟霄嗟我塵蹤之蹉跎兮幸暫釋夫天袞
寒雁噉噉而斜度兮晨雞喔喔以將號乘清興而屬辭兮庶
永示於漁樵

游小鑑湖辭

緬山陰之幽迥兮聞萬壑之交流
滙鑑湖於一曲兮自昔志美于前
修何茲水之如鏡兮乃佳名之是郵
藉嵐翠于細林兮鬱松竹之相摻際
同袍之清暇兮呼權郎于扁舟既延
緣于葭菼兮復瀏覽于鳧鷖雲容容
其將散兮風欲起而悠悠而激宛其
聯屬兮炊烟澹而始浮律未移于夷
則兮時二十露已下而如秋
繁涼雨共新霽兮薄暑晚而微收余
情眷其瀟照兮擷菱藕以爲羞忽弦
月之東上兮光遙耿于斗牛展嘉客
而詠佼人兮擬賀監之前游惟恐茵
苔之將疎兮年華逝而莫留冀勝踐
之可再兮繫清夢于林邱

游歷下亭辭

同吳王綸楊廷標作

扇微颺于衿袂兮槁梧下于中庭
羈人延佇而苑結兮溪流眇以攄
情惟主人之愛客兮云有瀟洒之湖
亭際新秋而益爽兮合天水以澄清
爰載之以方舟兮復申之以飲饌遂
褰裳而嘯侶兮肆心期之蕭散乃延
緣于枉渚兮歷雉堞之參差初陽倏
其晴霽兮秀傑閣於溪湄蘭茝衰而
欲歇兮荷芰悴而猶鼓動涼氣于蘋
末兮吹髣髴之絲絲跂鵲華於烟中
兮雙尖澹而凝綠隱橫橋之宛轉兮
亘村墟之往復洵景物之如昔兮何
名士之難逢吟李杜之篇什兮想圖
畫之爲工歷下亭中唐宋詩版庚午年當事悉理爲杜礎惟李北海杜少陵兩詩別勒于石趙子昂仲穆均有明湖圖余昔曾見之嗟樂往而哀來兮望雲樹于江東指親舍而安在兮忽涕泗之霑胸

丁丑秋暮將有京雒之行門人汪心葵出楓林茅屋圖相示蒼厓紅樹如見故山因作楚詞貽之亦庸以

志余感焉

寒山欽岑兮唯石嶢嶢霜露交下兮木葉以凋水會波兮江路遙嗟之子兮耽此蕭寥結葯房兮翳蘅皋薜荔為袍兮辛夷為橐眷暮節兮以嬉以遨曰師雲將兮曰友松喬緬昔賢之得一兮謝桂焚而煎膏念我生之猶未達兮方往即乎謹敬厲玉軼以騰逝兮孰微尚之能操歲晚晚其奄盡兮雲霧曠而回蹙顧邱樊之嶮廓兮中結軫其鬱陶儻遡風以攄懷兮希微詞之是招擷荷衣與蕙纓兮終攜手以消搖

得古槩於市中上玉柱篆文曰蒼龍嘯月眠其空中有大宋雍熙四年及孤桐應鍾數字尙可微辨餘不能摸寫矣因為之辭刻于匣上

肆余懷之澄澹兮慕大音之希聲惟幽閒而孔靜兮適幽契

于生平入市而適所願兮見素琴之晶瑩黝漆光之穆穆兮起緜理之庚庚考製造于何代兮自雍熙而合以成似蒼龍之嘯月兮爰肇錫以嘉名其文不得而悉詳兮中黯淡而微冥緬昔賢之御此兮寄止息之遙情滄波儼其汨沒兮秋山寂而崢嶸當移宮而換徵兮含得一於太清豈惟洗乎箏笛兮乃欲上遡於咸英嗟古器之罕覲兮亦古調之誰賡聊掩關而靜撫兮佇秋魄之將盈召冰夷而鼓瑟兮共浩蕩于東瀛

壬寅小雪後顧觀察光旭曹員外焜枉顧寓齋適開

化戴秀才敦元亦至同汎舟西湖雨中小飲日晚言

別乃作此辭

木葉盡兮霜雪滋忽妍暖兮雨繼之羌廓處兮掩緇帷想佳

人兮天一涯喜二妙兮來河麋如雲生嶺兮如月墮懷喚艇
子兮聊娛娛伊仲若之遠道兮亦過訪而追陪擷嘉蔬而作
饌兮傾沈齊以同持皆吾黨之密契兮允協德于墳篋嗜墳
典以爲餐兮指山水以爲期矧蕭辰之閒曠兮際景物之幽
奇共絃詩而道古今詎世俗之能希日晚晚其將暮兮尚流
連而不知疲嗟交手以西行兮再合并其何時斲素心于勝
地兮偕卜築夫茅茨庶麗澤以窮年兮殫理道之淵微

題陸朗夫中丞畫像贊

懿古名臣正直是與靖共爾位用塞疆禦蓋道則然適安其
故惟公自少翱翔雲路日光玉潔風稜已樹彼童而角卒虢
以怒弗磷弗緇積豕之互曰返吳淞蘆墟漁步陔蘭幽幽庶
永終慕相臣薦起迄於撫楚軫諸勞獨拊之煦之剔諸蠹弊

薈之去之焦神勞形靡間寒暑總公生平純粹堅固本以貞
廉勵以確苦行以簡易要以仁恕拔乃悃悞抑其阿附垂四
十春寧改斯度稽古愛才宛矣寒素公德方彰公歸何遽遺
像空懸惻茲黎庶我直西清周旋綦屨風節文章相期軒
翥跡雖未同義各有據分張幾何龍蛇忽賦獄雲南浮湘波
東注翼翼巍祠靈旂此御今作贊詞豈爲公譽立懦廉頑俾
勗庸孺

諸申之像贊

君爲予癸酉同年後同直內廷所居教子衡衡
與予比鄰倬直之暇往還無閒後出守辰州爲晉
寧李公所重而辰沅道忌之李公移任遂爲所中
卒以罷官今令子開泉廣文以遺像相示則列已

四十年矣爲之泣然因系以贊曰

君之詞藻韓如春華君之意氣皎如秋霞鄙糞壤之
卒委命於含沙鏡湖兮透迤稽山兮崑崙幸故鄉之
宛樵屋而漁槎歎沉湘之不可久居兮託靈氛而切

題顧治齋 成志 小照

靜而正其神定也直而溫厥德醇也少壯好學耄
書故人謂山澤之癯吾謂鄒魯之儒也

見復齋銘

亦韓先生以見復名齋齋名天下久矣
先生所見余蓋未之見也姑作銘以誌益其
以余爲有所見耶

一陽來復惟幾惟深云何而驗見天地心天本無言地

朕厥心安在孰究其蘊如見其復常見其往指心往來卽
虛妄心不可得何況于見無見求見狂華之眩邵子釋之
於子半黃泉欲動葭灰未轉見從何施巧歷莫算其復如何
迴絕言思心非塵影見非思智心無心者舉目乃是寂寂
齋尙湖之陽水周于戶雲歸其堂茅茨弗翦蘆簾自垂以
爲字郵于四陲先生老矣久得道妙淵默尸居自他有耀世
諦將空水觀非昏于不見中以觀其竅爲山河地爲日月燈
凡諸有見幻緣之增心識所斷見根所窮轉諸有見妙明之
通爲此說者非釋乃儒天地之心天地之初坐斯齋也吾無
隱乎

硯銘

風雪晨昏火夕唯石友並草檄與我周旋寧忍釋

蓮葉硯銘

溫潤而栗水玉膏上琢蓮葉冬不凋自我來燕與君曹
匣之截錦裝或挾以游橐以朝校書眎草畫繼宵今也
萬里遙不借圖史借弓刀點蒼之雪金江濤滌君塵
豪

鄺湛若硯銘

朱明僊人鸞鶴姿抱琴而死誰其知獨有石交心
義不甘磷緇今居我室毋嗟咨與子同書嶠雅辭

金生慰祖哀辭

悲夫衆庶之馮生兮紛祿命之短長非順時以觀化兮疇
心於彭殤懿吾子之穎異兮受奎壁之精芒襲雲霞以爲
兮製珣琪以爲璫蕙蘭鬱其芳澤兮夫容爛其文章旋策名

以入貢兮擢姓氏于巖廊乃猶謂爲未達兮來負笈于門牆
既指之以堂奧兮載示之以周行勿簷簷其自畫兮斬上溯
乎漢唐羌相視而莫逆兮請事斯而毋忘寒飈起而歲暮兮
堅澤腹以嚴霜何二豎之爲厲兮忽沉痾于膏肓思爾祖之
駿茂兮著光曜于文昌令補名洪銓雍正癸丑進士乾隆戊午河南副考官尋提督廣東學政
繼高門之榮戟兮宜累葉而重光伊中道而徂謝兮信天咫
之難量銘新宮而賦玉樓兮古固有乘虹蜺而驟鸞皇豈其
慕乎仙之人兮棄塵壒而悅康惟繡襪之呱呱兮孤嫠泣以
傍徨想鑿楹而何自兮恐覆瓿之靡常吳淞浩淼以東逝兮
滙練祁之蒼茫寄數行之清淚兮寫余忱之盡傷

程荆南哀辭

薊門九月兮木葉黃送子南往游瀟湘洞庭雲陰兮風又雨

得子瑤華兮渺何許絜才高而命蹇兮自長沙而羊城豈塵俗之難久居兮狎鸞鶴于瑤清惟子秉姿之雋異兮媿矜情于姑射吸湖光而飲山淥兮藉蘭蕙而蔭泉石掇明月以為璫兮擷芳蕤以為辭信離騷之苗裔兮恒茹歎而銜悲固謫降之當還兮載雲旂其奚之誦松寥之遺文兮宛音徽之若緬薦蘋蘩其何路兮涕浪浪其如霞嗟靈瑣之莫可詰兮倩巫陽而上招希夢寐之可寤兮庶永夕以永朝

汪雲壑哀辭

天之生材蓋千萬而得一人焉既生之矣少而摧折或以其未成尚無足惜也若生之復成之迥然特拔於千萬人中而其為天所拔者德足以副其才才足以副其望偉然傑然將大有以見于天下後世而摧折隨之豫章之木千圍百丈宜棟梁之任不幸為水火風雨所剝蝕是尤冥冥之不可知者吾故於雲壑之卒曾歛累息申夜轉輾不能解於天也作為哀詞聊以據余之苑結云爾

伊洪鈞之沕穆兮秉一理為流行復有數以雜糅兮疑造物之非誠矧仁者之必壽兮而覆者之由傾宜其理之一定兮奚長短天壽之相乘至人固修以不貳兮獨惜顛倒互出而難憑繫吾子之受氣兮本乾端坤倪之粹精既手容恭而足容重兮乃聽思聰而視思明由淳意以肆於文兮函雅故而本羣經雖瓊林之首唱兮時遜志而奉橋衡始奉職于芸館兮繼教胄于虞廷旋出使牂柯兮育多士于庠黌思育賢以報國兮勗忠孝而造以廉貞自回鑣而再入直兮桂宮重以為儀刑望彌重而意彌沖兮恍乎執玉而持盈暨余賜

春風堂集卷五十一
告而遂初兮肆長筵而饒于林垌作篇章以相送兮喜余之
投老而歸耕方分衿之數月兮聞奄忽而返幽冥雲未雨而
滅沒兮華未實而飄零羗縷縻其不可止兮號祝予而沾膺
非天物之暴殄兮胡弗縱以彭鏗抑韓子之所謂兮恒不足
于賢英問彼蒼之夢夢兮聊寫余心之怆怆

金孝子哀辭

孝子名鋤姓金氏其先由浙江桐鄉縣遷太倉州幼淳篤祖
侍御君燾奇之曰是兒必大吾門年十四祖沒號泣盡禮期
年未嘗有笑容父垣官刑部員外郎不携家鋤懇隨侍于京
師遂入太學乾隆五十年春

天子幸辟雍獻詩稱 旨蒙朱提文綺之 賜名公卿爭譽
之已而父病鋤帶不解曉不交者兩日夜禱於天祈以身代

雖風雨不怠未幾垣竟以病歿鋤時骨立如腊強起治喪水
漿不入口且曰我請代而天不許必我意有未誠也深自咎
責晝夜長號救日氣僅屬伯父舉勸之鋤張目曰已矣以歸
柩事累長者鋤罪也瀕沒呼母數聲乃瞑時乾隆五十二年
七月二十二日年三十有一距垣歿才二十日耳於是都門
士大夫翕然稱孝子歌詩以記之昔余與侍御君同官內閣
相善也後三年鋤之叔塋埒皆來從余游今二子者亦先歿
十餘年矣余五十四年自江西入爲刑部侍郎始聞鋤死孝
事甚悉故著爲小傳而綴之以辭

稽臥苦而枕塊兮昔者傳諸禮經至毀瘠而繼以死兮滅性
迺非其恒嗟子篤孝兮造化所成漿不入口兮慟血而撫膺
亘朝夕之躑躅兮體孱弱而弗勝魂煢煢而飄揚兮幸隨侍

於先靈惟子仁暨文祖兮照載籍以留馨越杜揆之童卯兮志哭墓而垂名子今得比于前軌兮矧有道孤之崢嶸固仁孝之宜大其報兮亦將永著于丹青

汪容甫哀辭

貢生汪容甫名中好古博學長於經誼凡六書說文金石之學靡不淹貫性簡伉以狂儼自命動與時忤至論其學術則斂手推服無間言者作經說數萬言正於予予凡過揚州輒出所作以相示十五年如一日也少貧既而當事知其學以御頌四庫書屬掌之餽以修脯因得稍稍自給甲寅冬以事赴錢唐書來將過予履二齋久之不至比見庶吉士戴君敦元言容甫與士大夫會飲極酣適一昔病逝矣余悲容甫學業未成子尚幼衣食才足而遽以世化故辭以哀之

覽造物之育才兮視性情爲短長性苟好夫詞藻兮若春華之早芳俄韶光之不處兮遂蕙隕而蘭傷惟潛心於實學兮儼松栢之堅剛水石清而愈厲兮冰雪凝而何妨今吾子之奄忽兮嗟天咫之難詳子生而具姱質兮學敏練而豐饗既博聞而洽見兮尤經誼之鏗伉執鄭服爲規繫兮置賈孔爲舟航凡遺文與墜典兮皆穿穴而括囊稽兵制於井邑兮考制度於明堂匪空言之聚訟兮期可獻於巖廊羗根柢之深厚兮乃發揮於文章遂希風于西漢兮與北宋而頡頏矧操持其孤絕兮時或謂之清狂惟向吾而請業兮屢相見而愈莊知撝謙之集益兮庶造詣之邁常昔經師之多壽兮轅固八十而彌強申公亦逾夫九袞兮安屯聘以纁黃嗟子髮齒之未老兮宜俾熾而俾昌昨余經於邗上兮尚譚藝而礪琅

喜奮衰之如雲兮洵芳骨之開張何薄遊之汗漫兮得醉飽
而云亡子勿稚而甫毀齒兮掩著述于空箱吾黨又弱一个
兮雖百身而奚償望大江之漉漉兮睇平山之蒼蒼楓林蔚
其青黑兮想魂氣之飛揚寄哀詞于薄奠兮掩余衿之浪浪
惟痛微言之將墜兮匪軫私誼于門牆

郭文學誄

陽曲之裔瀕於河汾山盤水鬱鍾靈網緼是毓異材敦龐耆
碩長身于思千夫辟易迺君至行始于寧親厠踰澣酒靡間
宵晨逮及友于易衣并食越七十年融融翼翼經紀困廩節
量錢刀小大歛手孰敢譴呶冥德俟天蒸蘭苗玉砥以經師
用勗門塾河東家範涑水書儀日詔有造敦迺民彝馭下維
寬禔躬必正不愆於儀楮持家政結衿履綦辨色而興誰有

情竄其勸其懲如辛慶忌被服共儉制節汰奢式完素檢周
旋隱襯次篤諸姑睦嫺調恤久而弗渝誰貸相錢誰麗形劉
傾我囊金釋其桎梏君之惇誼州黨所宗頑廉懦立季和仲
弓君之清徽寰瀛所美革斲剗澆喬卿文理同居五世鄭氏
之遺媿諸麟鳳疇曰匪宜君今逝矣旌門表額後儒歎嗟有
司矜式麓臺蜿蜒德與俱長敢告惇史眠此誄章

祭山川風雨神文

惟乾隆三十四年己丑七月乙未望翼日丙申經略大學士
忠勇公傅恒定邊左副將軍果毅公戶部尚書阿里衮定邊
右副將軍領侍衛內大臣阿桂敬以羊一豕一躬祭於山川
風雨之神曰惟緬甸僻介海裔蟻行蛾伏嚮與木邦蠻暮諸
夷伍本朝因時百蠻誕置之荒服外不享不臣令自長其

地勿予禍謫越於今百十數年比者夷酋戕殺木梳恃乃獷
鷲篡竊莽達喇地繼小腆憤駁嗣血人於牙役使諸夷甚虐
諸夷咸崩角哀籲丐胥匡以生

皇上爰敕偏師填撫用對於天下出夷尙弗駭竄喙息羈我
民人撓我土司數脅羣醜方命茲恒等肅將天威義征不諱
烝烝皇皇是致是附是伐是肆卜以茲月庚子啓行習吉繫
惟緬地崎嶇蓄翳霑雨恒作夙爲烝徒憂用敢昭告大神尙
克默相我陵我阿我泉我池毋蘊毒癘毋積泥淖毋困險阻
跋涉俾我軍士敷奏其勇仍執醜虜遁求厥寧適觀厥成則
迓神之庥謹告

祭陣亡將士文

惟年日月經略傅恒副將軍阿里衮阿桂致祭於陣亡將士
之靈曰嗚呼自緬甸阻兵拒順越今三四年凡我滿洲蒙古
索倫泉四川貴州雲南將士赳赳桓桓以次授命行間甚衆
於禮爲國殤於義爲鬼雄于史冊爲仁人志士英風偉烈震
動蠻徼而我

皇上軫念死綏錄其後裔出 內府帑藏給予祭葬躋於昭
忠祠又 命詞臣摛文著傳以颺於國史 崇恩懋典千古
無與比校屬在沉寘乃罔不屢敵愾茲某等恭承 廟算誓
掃醜虜三路行師水陸竝進訊以是月庚子昧爽啓行用先
具牲醴奠告惟爾忠魂實左右之俘囚執馘俾不得逃死以
訖天誅且以遂爾翦仇雪憤之意尙饗

祭山川旗纛諸神文

乾隆三十八年歲次癸巳十月庚子望越五日甲辰太子少

保定西將軍內大臣戶部尙書阿某參贊大臣領侍衛大臣
固倫額駙色某祗率諸領隊大臣及提督總兵官等敬以太
牢致祭山川旗纛鎗炮之神曰惟金川逆番倚恃險隘豺狼
爲羣世濟其惡曩者郎卡弑父戕兄弱肉強食擾于鄰封
天兵四臨死喪無日稽顙哀籲丐貸喘息

皇帝班師宥罪予以更生恩至渥也甫荷赦宥旋作不靖厥
子索諾木暨莎羅奔色爾達等復逞爪牙恣吞噬伺革布什
咱之隙戕其土司繫其妻子奪其印信又指喉小金川僧格
桑攻圍鄂克什醜徒烝烝蔓於巴朗拉達木巴宗荼毒生命
諸番銜恨次骨疾首連詞請討速剷絕爾等之命

大皇帝如天好生以小金川往者爲郎卡侵迫大兵鋤強救
弱出諸水火登諸衽席今小腆負恩反噬厥罪較鉅用敕

大兵先戡小金川其索諾木等姑貫誅殛以俟懜悔而賊會
罔有悛心出死力黨凶逆抗我顏行傷我徒衆貪殘狡悍罪
惡盈貫覆載必不可容 國憲必不可貸至小金川番衆狼
貪蟻附厥罪本均壬辰之冬削平美諾諸寨番人胥麇奔鹿
駭走死路絕厥角歸順

皇帝免其獮禽且命爾宅爾田安堵如故降番弗寧幹止金
川人有誑其惱輒復蠢動僉當勦無噍類茲

皇上命某等統率諸軍益以京城禁旅暨盛京寧古塔黑龍

江勦

貴州湖廣陝西甘肅銳卒轟訶絡繹來赴

自 惟綏又窮番救寧邊徼出於萬不獲已非

集天下臣民共信共憤者伏惟山川之神出

方旗燾鎗炮之神如龍如螭如震如電振我

以邊至三意此者雄師竝集諏吉啓行所祈上承

氛祲遠銷雨雪靡作俾我赳赳桓桓之衆涉

謐之仁身竊九重宵旰之念是賴神功洪惟俯鑒謹告

太白山祈雨文

具官某等謹告於太白山昭靈普潤福應尊神曰竊惟八川
沃壤三輔名區膏腴夙擅干秦關饒衍共誇爲陸海向邀神
佑普樂時和旣五風十雨之無愆自千倉萬箱之攸賴固已
黍稌被蔭井里沾仁乃自去冬久稽豐澤飛花雪颺罕蒙優
渥之施觸石雲興終鮮滂沱之益今者麥田將秀菑屋懷憂

望溝塍而僅見揚塵占躔次而仍虛離畢春深秦嶺祇望祁
祁日照蓮峯轉愁杲杲某等職司官守心切民依慮畊石之
少收致炊珠之莫繼田功至要神聽非遙謹遣署鳳翔府通
判周世紹肅詣靈湫再求德水惟祈鑿格早軫痾瘵叱蠶燕
以遙飛鞭惰羊而盡起立頌嘉壽徧灑窮檐庶幾來蘇相慶
密雲無怨乎西郊大有頻書多稼咸登于南畝敬陳祝號用
達悃誠請命之殷速賜降康之効謹告

雲卿文

一 及兮紛國是之惟攘忠定旣罷斥兮忠簡亦竄
之剛正兮志恢復于巖疆洵有德而罕才兮
元纁以弗顧兮冀冥鴻其何鄉羌知幾而
可方惟荒祠已千載兮對烟水之蒼茫幸

園亭一止焉今伊手澤之難忘緬神靈其未沫兮侶鷗鷺以
翱翔歷九邦之人士兮希風節之邁常將頑廉與懦立兮僉
志潔而行芳庶剡剡其來降兮享醇酎於空堂謹告

祭王次山先生文

歲在己巳某初見公侍公几席昕夕相從自顧生平學問踳
駁辱公訓行加之雕琢勗以立德期以古人從容叩擊經義
紛綸去冬歲殘雪花填委我作聯吟送公旋里公得我詩伸
紙淒其臨岐勸勉後會無時今春來吳風雨蕭槭方思挈舟
訪公眠食何期惡耗來自海虞哲人往矣涕泗沾濡維公風
概方領矩步禮以仁清德以道樹靈均倬直孟博清英紛有
姱節嶽嶽稜稜公之經學穉都仲理公之史學君卿夾漈下
逮小說杜陽諾臯悉供輯略日耕手鈔公在鑾坡文章報國

作爲詩歌雅頌是式公在諫垣一角神羊皂囊對仗白簡飛
霜初使黔中再使兩浙公拔其尤以正乾苗公之雅望
帝眷所依方將大用式邁其歸西望長安軟紅十丈閉門養
痾以全雅尚琴湖澹沱拂水噴岈籃輿小艇吟嘯往還嗟彼
俗學不知根柢誰抱遺經用究終始公來主講手畫口陳昌
明絕業一髮千鈞經師人師維公奚愧不朽兼三達尊有二
曰仁者壽宜享期頤龍蛇忽兆胡不憖遺喬嶽峯摧星芒夜
隕典則云亡風流頓盡謁公靈座薦公芳蓀寢門一慟愴結
聲吞表公遺文傳之奕世不負師門庶幾在是嗚呼哀哉

祭孫虛船通政文

悲夫霜飈之夕厲兮歲序愼其嚴冬攬百卉之具腓兮凋謝
及於喬松惟先生之峻潔兮貞廉肇於初生旣紉佩夫椒蘭

兮又申之以計蘅紛自遠於埃壙兮滄沆瀟以爲清雖价人之維藩兮詎貨賄之能撓九重廉其練要兮俾徧陟於羣卿復入侍乎桂宮兮在先民之是程嗟先生之惻愾兮宜平格而純嘏胡精氣其日彫兮頻虛中而暴下遂梁壞而山頽兮卽雲車與風馬憶予昔在平津兮知太傅之品題曰惟是其明德兮洵當世之所稀余默存而心識兮用介覲於光儀羌亦許爲國士兮稔余疾惡而杜私茲哲人之永逝兮涕浪浪其由頤生雖列於簪紱兮亡乃媿於黔婁貝哈靡以飾其終兮何柳絮之能周恃清芬之在天壤兮麗典冊而恒畱奠生芻以陳詞兮寫憂心之且妯嗚呼哀哉

祭沈歸愚宗伯文

惟文章之升降兮繫世運之盛衰必名儒之間出兮乃總持

乎羣材懿

聖祖之中葉兮實元會之胚胎先生生於是時兮毓鳳麟於草萊彙羣言之粹精兮窮六藝之根荄譜道德於音聲兮陋麗藻之葳蕤羌揚風而配雅兮爰式浮而起靡久晦跡於委巷兮迄白首而誰知逮

今皇之御籙兮際三五之昌期始不遇於制科兮卒乃漸於雲達由詞苑而宮坊兮典宗伯之隆儀

帝聿咨其宿德兮 命陳詩於彤墀降 宸章以爲緒兮染

去國兮 詔欲允而然疑指詩老爲故人兮需稠疊之鴻施望觚稜而不忍別兮徐返權於江湄 駕三臨於吳越兮恩禮進而益滋儼賡歌而喜起兮洵千載之一時嗟小子之禱

昧兮夙獲侍於履綦許斯文以代興兮匪門牆之爲私緬樂志之二紀兮純嘏躋夫期頤知神明之如故兮卜上壽其可幾值負豐而南淮兮方效命於軍麾聞騎箕以遐逝兮涕濡袂其歔歔惟篇章志於藝文兮生徒遍於海陲循泰山而揭星斗兮又奚藉於陳辭歎萬里之阻絕兮弗躬奠夫尊彝寫微忱之蘊結兮冀得達於緇帷嗚呼哀哉

祭陳文勤公文

嗚呼宣尼所稱古之大臣不可則止以道事君厥道維何曰儉曰仁儉以持己仁以養人公本相系如甫及申初入詞苑聞望日新暨秉節鉞迄宰衡釣終始一節夙夜惟寅政之治忽氓之吟呻念茲在茲不哂而嘖誰爲繭絲膏澤是屯誰爲束濕刻轢是臻公必爭之弗比於羣曰仁宜然刮彼紛紜公

所自奉恒侔賤貧食米一溢茹草一殮觀頤之適若羞膏臙曰儉宜然陋彼鼎珍某之通籍實公所掄望公眉宇儼瞻峨岷言提其耳勿恃多文童卯所肄勿忘勿淪惟仲孫蔑勗於昏囂有臣聚斂乃與盜鄰害於而國凶於而身汝他日者有社有民罔以心計營於錢緡思公斯語詎無其因敬佩彝訓比諸書紳自某別公忽閱三春茲來京雒公爲明神公之篤棐久格楓宸引年 予告許還榆枌寵以琬璧尙以元纁挂帆南下通潞之濱百僚祖帳榮此 恩綸胡不延洪乃乘白雲入揖而哭涕泗霑巾其饗清醑下慰蒿焄方今大蒙有惡其氛稱干敵甲勞我邊軍知公念此憂心如焚蠶旗煌煌游於彤雩庶落旄頭式安鋤芸嗚呼哀哉

祭來文端公文

春融堂集卷五十一
聖祖臨御六十一春河嶽之氣鍾爲偉人公於爾時已侍紫宸仰見 天顏穆穆收收曰汝揣朕所思何因時替御輩妄有所云

帝曰不然匪我思存昨閱揭櫫積如廩困多藏非計宜散以均明乃詔諸旂衆之貧凡所質貸咸以實申丐而與之俾無嘔呻其或誣僞有司具陳

帝曰無庸恐澤以堙財通於世猶血於身天下一家藏富在民勿以瑣鄙畫其溝畝又侍 南苑旌旃續紛和門始啓射夫臻臻忽傳封奏來從粵閩海水羣飛臺灣已淪

帝曰徐之勿驚勿震命此疆事責維督臣或謂失地應膏斧斤曷不易將而舊是循

帝曰彼罪我寬以恩彼慚且慄必力自新若其改使壁壘誰因不諳厥地猶治絲棼適債乃事云何克振不旬月後捷書果聞乃嗟 聖哲如日於旻公退食時岸其冠巾時舉二事誥語維殷匪述故事用示寬仁游於太和贊理網緼勗我懸鞭戒彼束薪胡不萬年永秉衡鈞公於易老夙自習熏幽明終始通乎朝曠數息而化等臂屈伸想乘台斗蔚其風雲左右

聖祖相此黎元公雖往矣不亡者存我猶視藪歎息徒勤躬奠酒醴佐以牲純靈爽如在或頷此文哀哉尙饗

祭太保大學士尹文端公文

古稱蓋臣憂民憂國與時偕行之死靡忒詎以昇平乃忘憂恤惟公世家闕施交戟韋平之望煌於竹帛公事世宗文章是職出入諷議從容退食

帝曰偉哉萬夫之特簡之羣僚汝爲汝翼往奠江淮龍幡熊
軾公感

主知語輒沾臆公事

今皇古訓是式無偏無陂有典有則不愆不忘旣匡旣敕出
總方州入侍宸極爲鳳爲麟俾毋殞殖肆其勤勞祇承
明辟公所節鎮半於方域維此南邦實公生息民有稻梁公
蕃殖之民有螟螽公翦剔之頻來誕保澤洋膏溢

天子念公命公作弼吳人謳思鱗魴九戩走送且畱駢闐萬
億暨乎入輔訐謔揆席謂道大行克敷成績胡爲窺公彌自
畏抑法家弼士思深慮遠詎以庸見井窺蠡測嗟余樛昧繫
公所植勗以寬仁勉以端碩自懼非材負公訓迪記別黃扉
歲華三易昨聞夢奠爲我心惻公歸帝鄉爰乘虹霓相我

哲皇祈天嗣宅廡我羣工孚先恭德保我黎民永綏耕織從
於功宗大烝用格獨睟師門弗親弗覲萬里云遐阻以兵革
弗躬奠醑弗侶胞翟寄辭侑尊聊寫傷盡嗚呼哀哉

祭 御前侍衛副都統博君靈阿神柩歸京文

嗚呼哀哉君之曾祖察哈爾臣於時弗服勞頓我軍旣執其
渠渠誰從者獨以身殉叢矢之下君祖都統少隸薪庫

聖祖奇焉拔自罪罟置諸期門勇濟以忠命典機務汝沃予
衷厥考侍郎卅年帷闥西北諸蕃資以鈐轄侍郎歿後君年
十三維

帝其憐屬羽林監君質粹美如日在東日前上處屬車攸從
樅楊射蛟雲夢殪兇縱轡若飛天顏以喜護彼纒頭往還
萬里弔彼蠻酋動靡忒禮歲次壬辰

慈寧萬壽 法宮燕喜介福

王母

上親上酒莽克庸歌命君次進槃舞婆娑維時冬融金鷄騰
翥祥雩御香蓋醞穹宇法部千人撞鍾鳴虞有壬有林德盛
揚詡文子文孫九嬪咸踐匪因異眷疇克預選蜀徼未靖雄
師如雲

曰汝往以崇汝勲君焯其勇帥曰慎旃母矜頌頌操螿以
君謂我豈慮勝後會我鏃我矢我礪我殺礮石雨集引而
不嘅指揮進止鉛著於頰臥病三日有風襲之盜米弗下旋
即於危君鮮兄弟未孕弱息元帥撫瘡齎涕盈臆君意不然
先死奚有紹厥先人不報不朽載吾蠶旂助而折首憶我掌
制君亦宿衛職業不同同接 禁地泉君在軍竝轡連茵事

必諮訪眎我猶昆今君貞魄風雲竝驅維此蠻鄉厥鬼睢盱
不可以處曷歸京都田盤渾河五雲舒舒顧瞻 宮闕其樂
只且而我送君有涕如雨縷敘昔言醉此清醕

祭穆荔帷文

惟年月日吏部稽勲司員外郎王某謹告于四川嘉定府知
府前工部郎中翰林院庶吉士穆公之靈曰嗚呼世祿之家
鮮克有禮三風十愆溺于太多眎以典墳厥類有泚坐之堂
皇覆狂而喜君少富貴金貂之第弱登朝宁出典府治温温
恭人謙謙君子被服儒素不愆于止我澤如春我操如水民
疾以呻若瘡在體莫以蒼鷹侈厥笞箠嘉陵之山江靜如綺
坐臥烟霞跌宕文史燕寢凝香疇見愠喜終和且平旋旋委
委謂君迂者蓋纖人爾去冬來軍與共鞭弭眎我如兄友君

猶弟惟道之同非勢之比君也持籌期免庚癸或念民艱歎
以繼晷團團毳幕蕭蕭壁壘寒風如刀起眺井鬼誰搆靈旗
以殪封豕感激憂時填膺刻髓君夙清癯曷以勝此君自黎
雅巡行北鄙走倅於都問我修澗寓書于郵訊我視履十旬
倥傯聞君已矣善人云亡詎有天咫君以世臣忠義自砥澁
氛未消歿視何已烽烟熺煇冰雪崦嵫遠莫致之一奠醜醜
我擅銘辭辱君所美有道之碑韋丹之紀行表徽猷庶報知
已千里寓書君其知未嗚呼哀哉謹告

祭魯絜非文

循吏之傳肇於史遷表其悃愾以警矯虔厥功非一慈惠所
先利爲之導害爲之指鑿碑勒石世美其賢茲風漸替流爲
鹵吳苞苴所需室家所計頭會箕斂以供貪鄙割此脂膏肆
乃鞭箠牧人牛羊奚忍如是積習已成爲之裂背嗚呼絜非
夙尚清修蘊爲德行程朱是求發爲文詞曾王是儔中年釋
褐返於林邱似玉含璞似珠伏流久而後出民隱爲憂溫國
之鄉遺風未邈師其恭儉法其忠孝必先必勞以富以教同
官駭疑迂愚騰笑爰賴中丞覺羅君稔其自好廉而不劌俟
著成效嗚呼我在豫章早熟君名林深豹隱光耀以呈讀君
之作與道爲營莫我肯顧愴恨於情京華相見意合心傾謂
我知己遇李之榮我亦喜君如珀拾芥期以仁聞慰我衰邁
胡不愁遺忽悲露薤方我南歸聞之心痠有文傳世有子繼
代適去命也於君何礙所恨悠悠循良安在灑涕告君情辭
慷慨乞愚訂頑用示寮案

祭嵇文恭公文

嗚呼公之德業

天子所毗公之聞望海宇所推及乎景福天寶所私相門出相少侍 彤墀六十四年聽履黃扉老成偕逝公獨巍巍天下以比夏商尊彝天壽平格乃古所稀公昔引年

帝勉留之

溫詔往覆懇惻其詞公感而泣忍再以辭夙夜

匪懈永贊

鴻基休休斷斷弼此純熙秋風忽厲雲深中台

天門誅蕩卒以騎箕某也後進辱公之知匪惟知之與古爲期謂某介特不偏以倚某在牂柯辱書見貽葛山去矣我獨徘徊鷓鴣嗁罷世得無訾仰公之隱非啞以唏及某蒙 恩獲還耕穡握手歡喜自顧齋咨張筵設餞勸以盈卮明明往事梁木其頽某歸亦病瀕卽於危耳嗚目闔氣息如絲聞公之喪 恩禮蕃釐十壇祭葬謚日星垂嵯峨大觚返在湖麋

不獲執紼以相喪儀哲人安仰爲世歔歔陳詞遺奠寫此漣漣

祭張太夫人文

嗚呼哀哉夫人之子爲時名人仲尤英特著撰紛綸與某交契譬猶弟舅某常謂之子實超羣如翼有鳳如角有麟抱此媵質蔚爲時珍云何湮抑不叨而龔仲乃告余命與窮鄰自少而孤居賤食貧母也紡績佐以組紉攻茶茹蓼風酸雨辛幸底成立母訓之純其數顛躓困於蓬門易衣以出求彼饗殮倚閭之望曷懈晨昏某願而言子母聲吞龍蟄必起蠖屈斯申用子績學誅蕩青旻受福于母繇祉畢臻衣則繡翟膳則熬淳子姑待之以報慈親分張閱歲寒飈然輪俄來哀訃悃範其淪豈果天咫難叩而捫惟茲內則播於宗姻列女之

傳信史所敦摠幽剔隱流示窮塵矧以仲才寧終蹇屯庶埃
綸綉式昭窳窳某非譎語用質幽魂臨風告哀有涕盈巾嗚
呼哀哉

林黃先墓文

維年月日曾孫某謹潔牲醴之儀告於 誥贈資政大夫大
理寺卿曾祖考勿清府君 誥贈夫人曾祖妣雷氏某德薄
能譎材質庸近荷恃先世遺澤加以父母訓誨幸通朝籍又
當 聖世隆平 國家迓釐錫類存布 覃恩用是祖父咸
登四品 綸音屢賁休有烈光歲在丁酉復遇
升祔禮成三代晉 贈二品恭承 異敷喜滋以懼邇者重
荷 聖慈 歸營葬仰惟制詞褒揚備至敬謹繕錄焚黃以告於

墓嗣是以後報

國恩繩祖德勉砥駑鈍力自振刷竊

靈默佑之俾毋隕越至生母錢氏兼荷

寵命晉封大

錄誥詞用祈昭鑒謹告

春融堂集卷五十一終

春融堂集卷五十一

青浦 王 昶 德甫

碑

慰忠祠碑

乾隆癸巳大學士定邊將軍溫公福帥師討金川二月次木
 果木六月朔己丑越九日戊戌師潰旋美諾又越十日己酉
 再潰歿於軍時賊氛方熾北侵馬爾當南暨科多文臣先後
 死事二十有六人總督劉君秉恬暨富君勒渾籍名以上
 上憫焉申 命定西將軍阿公桂覆覈奏如初乃下吏部兵
 部議其卹部臣言謹案會典文臣歿於王事照本官應升品
 級加贈廕子一入監讀書期滿選請以戶部主事趙文哲刑
 部主事王日杏僉贈光祿寺少卿重慶府知府吳一嵩候補

春風堂集卷五十一
從四品王汝玉僉贈太僕寺少卿同知鍾邦任知州吳璜彭
元璋常紀徐諗通判汪時吳景知縣程應桂徐瓚許椿孫維
龍張世永章世珍楊夢槎僉贈道縣丞倪霖倪鵬主簿吳鉞
僉贈鑾儀衛經歷吏目郭良相羅載堂僉贈府知事典史周
國衡許濟僉贈主簿其刑部主事特音布以旂例予以雲騎
尉世襲資白金自三百五十兩迄百兩有差又錫祭葬入祀
昭忠祠移翰林院立傳餘如例庶以稱 朝廷卹死褒忠至
意 制曰可先是成都聞變甘肅寧夏道顧君光旭諏於衆
曰稽古制以死勤事則祀之茲諸君或在幕府或守亭障驛
傳或理餽餉咸致命遂志有死無貳英颯毅然雖歿如在弗
有槌桷旅楹奚以妥靈魄以肇殷祀維城南杜工部祠旁羸
隙地庵屋若干顏曰慰忠祠祠成 卹命適至乃作主俾春

秋禋祀於是勿替會弟啓焜董斯役述顧君指來告願以文
文于豐碑惟金川竄伏窮徼若虬蟬蛾子自雍正中葉列爲
土司迺始蠶食諸部落血人于牙匡人擲人弗迪也邇者喉
小金川躡鄂克什繼戕革布什咱酋長以梗四川入衛藏道
如是弗誅是達賴喇嘛將弗克通職貢於 朝而西北蒙古
蔑以服教畏神匪曰一隅所繫於藩服者綦大且我 國家
武功桓撥大小是達顧使莽蜂辛螯卒荒具贅奚以爲下國
駿龐茲

聖天子義邊不諛而諸臣咸知疆戎索敵王愾之大計撥爾
而怒弗恤以血膏塗原野死事之烈近無與仿
聖天子卹其身延其子孫而顧君作廟以祀昭示蜀土也皆
宜旣爲之銘又取柳宗元文例擴諸君出處崖畧鑿于碑陰

銘曰

維古梁州華陽黑水有恆者克僻處西鄙誰與夸毗授以名
字爲虺爲蛇久乃益熾牲牲而走以角距試守臣瑟縮數議
胥赦封豕薦食

帝曰奚可兩道出師先龕小者恭行天罰其薙其夷小者載
摧大者匿之作逋逃藪九伐所宜師臣觥觥狃于嶮巖攻之
甘旬衆怨以疲遷而弗地師而不臨賊環於梁餽道以侵曩
所拓地貙虎其屯井鬼之次維日在鶉磯臺宵燭營門晝昏
士卒叫呶不介以奔諸君裂眦曰職在此不難不竦相率以
死疇飲鋒刃血漉於墻疇貫徽纆棘穿其腸疇經於林疇洞
於鎗疇膊疇蝟適命之常奔蜺挾電言歸帝鄉

帝曰其咨毋爾畫傷命我司勳銘于太常命我太祝祝祭於

勅世選爾勞麗於冠裳卹生褒死風諸戎行俾茲羣醜速於
鍊斯君也作廟孔碩孔虔灰以白盛東西七筵粟主攸次治
朝之聯永詔有司靈箬撰日肴蒸折俎盜齊麴實陰竹之管
龍門琴瑟歌哭而請亦有巫恒望衍詔號厥鼓登登靈兮醉
飽張弧挾矢佑我杜滅截彼夷裔

碑陰

趙文哲江蘇上海人乾隆壬午獻賦 行在賜舉人授內
閣中書兼司經局正字直軍機處未幾緣事罷復起爲中
書舍人稍遷戶部主事以能詩聞詳見余所撰墓志中
王日杏江蘇無錫人乾隆癸酉舉人由內閣中書舍人歷
遷戶部郎中出爲貴州銅仁府知府降級復爲中書舍人
遷刑部主事隨軍營遇賊格鬪死

吳一嵩江西新建人乾隆乙丑進士由知縣知州遷四川重慶府知府隨軍督理糧儲遇賊縛至河側傷重而歿

王汝玉山西靈石人以捐納選貴州貴西道降級來四川委用從總督於登春行至牛廠遇害

鍾邦任安徽舒城人以捐納授貴州大定府知府降級發四川以同知用守八卦碛賊至遇害

特音布滿洲鑲藍旗人由筆帖式遷刑部主事從軍督糧駐登春師潰中途遇賊死

吳璜浙江會稽人乾隆庚辰進士由戶部主事出爲湖南澧州知州丁憂起復發四川從總督於登春濫公兵潰君偕總督出至崇德山梁遇賊中矢石墜厓下卒君已卯中順天舉人出余門下工於詩有黃琢山房詩集

彭元璋江西南昌人乾隆丁卯舉人由浙江雲和縣知縣遷同知尋以事落職頃之復以知州用從總督自登春出遇賊投巖死君爲內閣學士元瑞從兄而學士與余同年故常見之京邸蓋老成篤實人也

常紀直隸承德人乾隆丁丑進士由四川西充縣知縣遷崇慶州知州在木果木支放糧餉工射賊至射斃數人賊攢刃刺之遂歿

徐諗湖北漢陽人由貢生捐納選授雲南鄧川州知州降級捐復補漢州知州調辦西路登春糧務被戕於八角碛汪時浙江錢塘人以捐納授甘肅西寧府通判丁憂起復選潼川府通判駐岱多喇嘛寺督站務寺破罵賊死十一月官軍收復小金川固倫額驢色布騰巴爾珠爾過寺見

血影濺涅壁間猶漉漉然如濕焉

吳景福建浦城人捐授廣西越嶲廳通判被議仍發四川候補調赴軍營効力遇賊死之

程蔭桂浙江仁和人乾隆己卯舉人發川以知縣用題署大竹縣知縣委辦科多站務賊圍糧站與其子烈同時遇害

徐瓚江蘇陽湖人乾隆癸酉舉人由方畧館膳錄選甘肅華亭縣特調四川新繁縣知縣在木果木辦鑄砲事遇變死之君在方畧館余爲纂修見君矍然而瘦人戲指爲草藁不知仗義死節乃能如是也

許椿浙江嘉善人乾隆辛酉舉人發四川以知縣試用題署內江縣知縣委辦登春糧站賊至被害

孫維龍順天宛平人乾隆庚辰進士發四川候補知縣委辦兵差遇賊沿途拒戰歿於山溝

張世永陝西渭南人乾隆舉人選河南濟源縣知縣丁憂服滿發四川候補知縣委辦兵差遇賊拒戰中矢而斃

章世珍貴州貴筑人乾隆庚辰舉人選授納谿縣知縣以失察私硝被議引見發川効力從軍辦西路糧餉軍潰死之

楊夢槎江蘇金匱人乾隆丙子舉人初署東鄉縣緣事降級發往四川題補酆都縣知縣委辦昔嶺砲局軍潰遇賊被縛不屈死

倪霖浙江仁和人捐納縣丞分發四川署西昌縣縣丞委

辦兵差在崇德山梁被害

倪鵬直隸臨榆人捐納縣丞分發四川借補布政使照磨
委辦西路軍差遇賊死之

吳鉞河南固始人以捐納選營山縣典史委辦澤耳多糧
站遇賊斷路力拒死之

郭良相廣西臨桂人捐納吏目分發四川署秀山縣石泉
巡檢派辦占固糧站在布朗郭宗經理支放占固被圍良
相率兵數十人奮力死守因火藥盡水路亦斷數日礮破
死

羅載堂順天宛平人由國史館供事議敘授合州吏目
委赴西路軍營遇賊被害

周國衡順天寧河人捐納吏目分發四川署秀山縣主簿

委辦西路炭廠遇賊而死

許濟順天東安人以捐納選納谿縣典史歷辦墨巖溝僧
格宗站務又協辦科多糧站與程蔭桂同遇害

附錄幕客同死難者朱南仲浙江長興諸生初佐木坪糧
務繼在美諾登春於崇德山梁被鎗死 楊紹沂浙江慈

谿人佐常紀於木果木被賊斫死 熊應飛江西星子人
佐鍾邦任八卦碶糧務被圍死之 田舒祿浙江紹興人

佐汪時幕遇害於喇嘛寺 顧佐江蘇元和人與吳鉞在
澤爾多被執不屈死 岳廷栻四川成都人威信公鍾琪

之孫在登達被害 周煒浙江蕭山諸生爲吳一嵩幕客
被害於木果木 鄭文四川華陽人徐諭幕客至牛廠被

害 許國安徽廬州府監生鍾邦任其妻之從父也隨在

八卦礮手刃賊一人被執爲賊磔死 長炳盛京長白人
常紀甥禦賊於木果木被害 王鳴鏞江蘇山陽人賊圍
喇嘛寺偕汪時死之

郭舟山廟碑

惟歲在辛卯八月小金川怙凶稔惡血鄰於牙厲兵進討是
冬總督桂君林戡約咱明年壬辰正月克卡了次達烏惟達
烏迤北厥東名翁古爾壅厥西名布勒尼得兩崖拔水數千
仞溪流湯沸箭激中微徑若線賊因是築柵固守頓軍十旬
餘謀者言達烏東爲婁仰崖嶂忽斷忽竦如翹如削莫能措
拇指乃西甲爾木山峻揭霄表巔復起峯七渫雲泄雨迄暑
雪雹弗輟然睇其勢可出達烏後抵僧格爾宗桂君領之命
參將薛君琮帥四川貴州暨土司兵三千循墨壟溝越是山

北抵於郭舟會大雨霰竟三日夜咫尺弗可辨識而甲爾木
西有峯曰博六古通金川賊緣是來援踞峻斷道糧絕軍饑
踣薛君力戰死覆歿者幾三千衆逾月桂君得罪罷

上命今定邊右副將軍禮部尙書阿公桂乘傳總其師既至
以狀聞於朝

上曰惟參將薛琮申討逆醜捐軀効命朕甚憫焉其贈副將
其子召入見餘士卒予卹又越四月阿公破翁古爾壅瘞郭
舟山下遺尸千餘具遣四川總兵英泰貴州總兵王萬邦賚
少牢奠祭復以狀聞

上曰其爲共冢立祠祀薛琮是冬阿公剗僧格爾宗殄美諾
醜徒蟻潰鼠竄小金川底平明年總督劉君祇奉 明詔乃
驅蠻隸伐山庀材乃飭工役范土合植樹泉揆日相於茲山

之陽剗闢犖确作廟三重中置薛君栗主前祀從征諸校又
斷巨扁悉揭諸士卒名於廡環以山泉樹以灌木其廟高題
大棟崇崇隆隆傳以丹采煥如霞虹番蠻行者越一二舍外
可企而見指而數也夫豈有所侈於此誕以慰忠魂表毅烈
俾稔我熊羆之士不二心之臣生敵王懷死爲鬼雄雲旗風
馬來遑邊徼其曷敢恃而瓜牙角距以嬰 天誅以迄冥極
者繼自今結龍霍爾諸部落俛首帖尾憎服砥屬維億萬年
咸若采衛將於是廟是徵庶以仰對

聖天子卹死褒忠綏心荒遐之盛意廟旣成會余從軍在蜀
君屬書其事且爲禮神之詞鑱諸石詞曰

九州之外兮萬山蒼莽石房如筍兮羣蠻所聚夕雪霰兮朝
而雨峯稜剡剡兮弗可以履阻中原兮萬千里靈何爲兮羣
萃止 礮石兮闐闐旗旒兮翩翩裹餼糧兮爭後先妖星吐
芒兮晝緯於天蠻之來兮如蜾烟霧兮羣羣溪流兮激激義
不反顧兮將焉食無食兮強起殺賊如麻兮鼓聲死吁嗟死
兮氣未衰挾慧帚兮乘奔雷 靈朝游兮嶺雪白靈暮歸兮
陣雲黑鳶鳴啄兮奚所恤彼蠻跳跟兮手搏以食灑血爲漿
兮剖肝爲炙

帝有命兮來九重恤嫠延嗣兮 恩無窮瘞枯髓兮幽宮葺
榱桷兮青紅坎坎鼓兮蹲蹲舞樽緹齊兮體在俎噴其嗜兮
什伯伍靈醉飽兮彎強弓揭長檝兮廉羗戎疇怙亂兮殛其
躬析而魂魄兮漭醢同嗟而狺狺兮敢不冀覩此廟貌懸高
空

永昌王氏家廟碑

我朝荷天景命啓宇東土實惟混同長白與夫女虛箕尾
孕精毓異用勸相我國家厥時睽蒙髣泮諸夷境逖遠在
萬餘里外綏服在十數年後而鳥味井鬼之氣胥蜿蜒蘊積
下鍾爲偉人俾偕戡亂佐命之勲後先疏附以勒功冊府者
則有大司農端簡王公公諱宏祚雲南保山縣人祖信父國
治刑部郎中公以崇禎庚午中鄉試歷官至戶部郎中
世祖皇帝入關改苛嵐道理大同餉務已復召爲郎中時天
下甫定曹署圖籍散佚公在戶部精練掌故凡直省錢穀贏
縮暨徵收支用各數咸能綜核而默識之用是爲
世祖知擢太僕寺卿遷戶部侍郎晉尙書加太子太保
世祖御南苑召問邦計公對以安民必杜私徵強兵必嚴冒
餉拯災則蠲貸宜速催科則程限宜寬語簡且叟

世祖嘉悅焉辛丑丁憂歸雲南還朝改刑部尙書未幾仍
筦戶部時有欲改州縣漕米官運爲民運者公爭之力
世祖卒從其言尋以失察吏胥弊當罷

聖祖稔其忠畱補兵部尙書庚戌以疾乞休再上得請行至
江寧疾甚乃寓居秦淮逾年而卒賜諡端簡予葬祭一如
典禮子三瑜工部員外郎瑄和州知州葬公於句容茅山故
皆僑寓江寧惟長子琦監生居保山之蒲縹故里乃立宗祠
堂以祀公寢以祀公祖父茲曾孫坦葺而新焉以公諸子及
諸孫祔且來告曰祠立幾百年而麗牲牢之石尙未有刻辭
吾家出自三原端毅公後與君同太原族望敢以文爲請予
惟永昌僻在西南微侏僂荒陋夙與夷獠伍士人不諳醕獻
氓庶不識譜牒公崛起於干戈草昧蔚爲名臣劬躬燾後延

洪勿替文孫咸知敦詩書修宗祀爲亟庸以風示里閭俾憬然尊祖敬宗合族之大義漸次修明彝典豈惟王氏一家之麻其補於朝廷教化者鉅爰因所請據公歷官大概作迎送神之章命工誦以祭公且以詔於夷裔其辭曰
蒼龍房心是爲明堂西將東相森羅中央迤矣柳注胥作其芒炎溟之氣合以點蒼篤生碩彥佐我

皇綱時維苞符貺遼之陽圭鼎初定向憂蝸蟻出師十道仍於鍊斯公司膺積總籌天倉忍疲我兵匱其餼糧忍困我赤罄其蓋藏爲上爲下於胥樂康明明

二祖个臣是襄生佩冕黻歿書旂常君子之澤五世其昌顧瞻先德聿修宗祊有楹有榑有俎有房從以孫子於禴於嘗世家巨室萬民所望臺笠緇塿慕及冠裳矧乃考室以升馨香睢睢盱盱聚觀仿徨展親合食識禮之方惟家之慶惟山之祥嵯峨豐珉蛟螭迴翔刻鏤銘辭眎此南鄉

重建永昌楊文憲公祠堂碑

明楊文憲公慎以議嘉靖大禮謫戍永昌好事者常作祠祀之乾隆丁亥戊子閒用兵緬甸以祠爲軍裝庫而其祀遂廢余時過訪之猶見游人題詩其壁而礮石之所積甲仗之所貯鼃鼃蝸廬之所游衍求粟主而不可得相與歎息久之及過下關迤西道博君明攜感通寺遺像來復賦詩以志傷悼而祠卒未能復也歲丁未余以布政使滇遂寓書保山令王君彛象謀所以復公祠王君遂於多福寺側啓屋數楹取感通像而像設之戊申三月余以勘驗城工至永昌顧瞻榱桷翼然煥然晉謁祠下羞以牲醴而夙昔傷悼之願始稍慰焉

嗚呼當大禮之殷也人以一身爭之而公以兩世爭之及其
廷杖也人以一次受之而公以兩次受之茹荼銜酷于古未
有然衡以往事定陶共王之議爭之者史丹宋濮王之議爭
之者司馬光程灝論其世以攷其人公之謫戍若擢日月而
行彼張璠桂萼方獻夫者蓋冷褒段猶之徒何足當一映哉
世之重公者多以博學目公而忘其扶植綱常激揚風義有
九死而不悔者而惜未列於秩祀也祀既成永昌耆舊袁文
典等將歛貲買田爲春秋祠祀計有其舉之疇敢廢墜乃爲
禮魂之辭屬王君勒諸貞石授諸神巫俾示永久且庸以娛
八、詞曰

沂嶠江而西邁兮跂新都之崢嶸江山紛其俶詭兮欽哲士
之所生拂天門而誅蕩兮扶天綱之將傾胡投荒以禦魑魅
兮歷卅載之孤癸公之才兮雲霞操翰墨兮詞芳華美廓處
兮幽遐侶狷鶴兮偕蟲沙帶女蘿兮折踈麻顧我侏僂兮不
汝疵瑕蠲春秋兮魂魄嘉從巫咸兮駐雲車公之來兮風蕭
然坎坎鼓兮雲和絃公之逝兮山雨晦苦竹叢蕉隱旌旆來
耶去耶杳不常剏新祠兮陳馨香朱鳥下矚兮森光芒睨與
織女兮分七襄踐纍之跡兮公其無傷

六賢祠碑

六賢祠在昆明縣五華山書院先是鄂文端公爾泰總督雲
貴始創書院以教多士院後有樓公去遂祠以奉公故又稱
西林學舍云先公而任總督兼巡撫爲楊文定公名時後公
而任總督布政使爲尹文端公繼善陳文勤公宏謀因次第
耐之最後益以巡撫李恭毅公湖司業王公太岳王公蓋先

爲雲南布政使故并祀爲六賢天此六公者聲望在日月之表而名位統岳牧之尊方在滇也勵風俗興賢才普樂利惠及於數十府州而經文緯武勤民體國又率出於仁義忠直廉潔之爲其閒多有入踐台斗勲在史笈天下指爲鉅人長德是固非滇之所得私也然滇人之被澤最久且深而昆明近在所治流風餘韻傳於父老者迄今未沫並舉而尸祝之固其宜矣乾隆丁亥誠嘉毅勇明公瑞奉 命總督旣視事展禮於祠下又二年今大學士誠謀英勇阿公桂在滇親奉灌獻故祠之聯額皆兩公所書庸以志鄭重景仰之意然是後祀事之不舉幾二十年栗主刊剝漫缺傾側於塵坌中莫之顧也予至俾髹者新之戊申二月十八日借書院院長前廣東惠潮道倪君高甲雲南府知府蔣君繼勳署昆明縣知

縣邵君倫清薦牢醴具籩豆命祝以告諸生與祭者數千人咸歡蹈踴躍喜墜典之復行也蓋滇省學宮之祀名宦迄於康熙中葉而止諸公概未之與有司不克以歲時致祭方爲時論所惜故余復其舊非謂報功崇德庶以慰滇人士之思焉余旣將事時李君朝綸以教諭監書院屬其詳定祭器之數盥獻之節每歲於春秋仲月次辛舉行又以昆明縣城南民房租息入於書院者取其餘以給祭祀用均揭之於石俾後人遵守勿替且爲官於滇者示之規範云

春融堂集卷五十一終

永豐堂集卷五十二

青浦 王昶 德甫

神道碑

戶部侍郎署翰林院掌院學士夢公神道碑

乾隆二十三年八月戶部侍郎夢公卒於位先時公病謂昶曰我生平取士多矣惟子古體文最善且知我之深今我不幸將以病瘵終其為我撰墓道之文庶幾猶不死也嗚呼昶其忍辭謹按公蒙古人西魯特氏諱夢麟字文子號午塘白稱大谷山人世居科爾沁高祖諱博博圖

太祖高皇帝時率所部來歸隸正白旂授佐領

太宗文皇帝天聰元年隨征錦州歿於陣與三等輕車都尉世職 贈太子太保吏部尚書祀昭忠祠曾祖諱明安達哩

襲都尉 國初定鼎累著戰功官至吏兵二部尚書理藩院
尚書授安南大將軍加太子太保爵二等男諡敏果祖諱化
善一等侍衛兼佐領父諱憲德以蔭補刑部郎中歷官至左
副都御史巡撫湖北調四川陞工部尚書議政大臣兼正紅
旗滿洲都統母郭洛羅氏 封一品夫人生母王氏 贈夫
人尚書公六子公第五也生於成都官舍六歲入塾敏悟絕
倫時大學士黃公廷桂總督四川見而愛之以女妻焉七歲
解習唐人詩乾隆九年六月補學生九月鄉試中式明年會
試成進士改庶吉士十三年散館授檢討十四年二月扈

蹕

不陵十五年三月充 日講起居注官五月遷翰林院侍講
廣西鄉試副考官七月擢國子監祭酒九月提督河南學

政十六年授內閣學士兼禮部侍郎十七年六月湖北奸民
馬朝柱踞羅田縣之天堂寨將謀不軌聞捕散匿公以河南
商城縣界連羅田親往督緝

上深嘉之七月以郭洛羅氏太夫人喪旋京十一月疏言商
城為兩省交界峻嶺深巖宵小易於藏匿原設把總不足防
守請酌撥守備增兵巡哨 勅下河南巡撫議行十八年二
月署戶部侍郎七月充江南鄉試正考官九月提督江蘇學
政如曹仁虎嚴長明吳省欽趙文哲張熙純咸被識拔待以
國士二十年五月授工部右侍郎七月回京署兵部扈 蹕
熱河十二月兼蒙古鑲白旗副都統二十一年八月 命在
軍機處學習行走二十二年正月扈 蹕巡幸江浙至山東
命督辦荆山橋河工程三月報工竣

上諭云上年孫家渠奪濶荆山橋一路淤墊爲患夢麟與白
鐘山等辦理妥速可嘉其交部議敘并 賜戴孔雀翎時
上親閱河工以六塘河以下積潦桃源宿遷清河等縣窪地
皆爲巨浸分派公率道廳等查勘尋奏六塘河上承駱馬湖
水至清河以下分爲兩派由武障義澤等河入潮河歸海長
三百餘里間淤數十處致水停積已委募急挑南北兩堰及
去年水壞宿遷堰工並各處缺口俱加修築其桃宿等縣積
水酌開溝十五設涵洞五建閘四以資宣洩疏入報 聞六
月奏荆山橋善後事宜一銅沛廳北岸丁家樓漫灘黃水滙
入蘇家閘直衝荆山橋河身壅塞最易應令河員築壩填堵
一荆山橋河道在銅沛邳睢境者應分四汛歸河務同知專
管飭州縣協辦一自微山湖口至荆山橋下游之王母山紆

長灣曲灘嘴更多宜每歲霜降後疏掘一請嚴禁居民於灣
處圈築堰壩捕魚渡口接築馬頭阻塞河路得 旨皆如議
行先是山東巡撫鶴公年奏金鄉等縣水患 命侍郎裘公
曰修借公往來相度辦理至是合疏言金鄉魚臺濟寧久爲
微山湖水淹浸當籌分洩之路韓莊閘南有伊家河至江南
梁旺城入運久經淤塞今議開濬俾積水乘勢東注消涸自
易從之七月兩江總督尹公繼善復奏沂水散漫入運爲沛
邑害請酌湖口閘應行事宜公奉 命與在工諸臣分任責
成九月合疏奏淮徐海水患頻仍必原委並治支幹兼修庶
可甦積困而收實效山東江南接壤諸湖已相機籌辦惟沂
河自盧口旁洩沒民田阻運河當築壩堵截使不得入運湖
流方可全力下注此籌酌沂水微山等湖入河歸海情形也

六塘河在駱馬湖下游爲洩沂水要道北岸宿遷臨溝地方有水口桃源有港口俱注沐陽縣之沐河入漣河歸海並加濬分路宣通六塘河歸海口門間有淺阻亦爲疏治此籌酌六塘河分導沂水入海情形也河南夏邑永城等縣水由睢河下注江南洪澤湖出清口會黃入海近年河道多淤董家溝等處尤宜急濬至各水旣歸洪澤出口務須通暢查清口束水二壩業經遵 旨拆卸其各閘收束時口門亦酌量加寬此籌酌睢河入湖並湖水入海情形也疏上奉 旨覽奏頗得要領宜和衷共濟不可草率塞責是月調戶部侍郎至十二月各工先後告竣復下部優敘公之在工也役夫數十萬指咸畚揭趨事昧旦而興指揮董率日在泥淖中與丁卒同勞勩故告成較捷然公之疾亦自此始矣二十三年四月

復調工部七月署翰林院掌院學士時公疾已亟

上聞 命太醫診視兼 賜葭藥及遺疏上

上惻然軫悼 賜祭葬如例蓋是時公年僅三十有一也公初聘黃氏未昏卒再娶吳蘇氏三娶宗室某公女子一僅周歲嗚呼自公先世咸以忠武英勇肇基東土執馘塞旗書庸竹帛至公始以文學顯自少以能詩名後益浸淫於漢魏六朝暨唐宋元明各大家蕭閒清遠之旨與感激豪宕之氣並發於行墨四方才俊攬其所作無不變色卻步初著有行餘堂詩入詞館有紅梨齋集在江蘇刪爲夢喜堂集後爲大谷山人集六卷長洲吳泰來刻之行於世公以學業推重藝林而於軍國大事尤能洞悉機宜治河之役條奏皆稱上意是以駸駸嚮用時值準噶爾內訌策凌烏巴什等叩關

納款已而阿睦爾撒納以餘孽叛

天子方赫怒出師而公念祖宗勳烈兼資文武且通籍十年登卿貳參密勿 恩遇之隆一時罕比

上又諭令習國語且學蒙古語以須大用是以晝夜呼憤常思恍懔請行立功萬里外而卒病瘵以歿公而終以文學顯也豈公之願哉爰承公治命勒銘於石辭曰

斗牛之粹會於東瀛曰鍾奇傑俾佐武成匪唯鍾之又從繼之勳伐之裔文以緯之我公伊少瑜珥瑤環風雲為思江海為瀾鴻文聿啟懋膺

天眷筮自翰林司農是筦公之高節冰玉為懷肯依畹戚以踐台階公之壯畧韜鈴在紀誓縛逋酋以寧月竈公志未終公道寧窮有詩百軸光若長虹甄錄單寒登諸 朝宁有眎

茲碑賈涕如雨

刑部左侍郎贈尚書錢文敏公神道碑銘

乾隆壬辰冬刑部侍郎武進錢公以居憂卒於里第

上聞軫悼 諭祭葬 特贈尚書 賜諡文敏且有學問素

裕勤勞夙著之褒又二年 賜其孤中銑為內閣中書舍人

蓋公以第一人魁天下直 內廷二十餘載任刑部最久數

決大獄讞事貴州適遘逆苗香要之亂不震不擾出奇決策

月餘葺事

上益知公才器可大受而未竟其用以卒是以 恩禮稠疊

如此公諱維城字宗盤一字稼軒自幼敏悟讀書日千餘言

十歲能詩十二三能騷賦古文乾隆戊午年十九舉順天鄉

試壬戌試為內閣中書舍人乙丑成進士 殿試一甲第一

名授修撰戊辰八月擢右春坊右中允入直 南書房充
日講起居注官又 命直 懋勤殿庚午二月擢翰林院侍
講學士九月轉侍讀學士辛未擢內閣學士兼禮部侍郎王
申奏言秋審勾到大典一筆輒關生死不容偶誤刑部堂官
及內閣學士俱執有手摺請於遵 旨論定後大學士執筆
卽各將摺內所開本名裂紙寸許爲記勾畢外出持摺互校
庶查核有憑萬無一失疏上報 聞甲戌三月充會試副考
官五月教習庶吉士丁丑正月授工部侍郎九月充武會試
正考官已卯充江西鄉試正考官戊寅奉 旨分理五城平
糶事宜公奏城東中南三路來厰距倉近城西北兩路來厰
距倉遠請分別厰地遠近酌定車價多少卽以東中南之多
補西北之少則運費無增而輓輸踴躍 詔如所請速行辛

巳調刑部左侍郎公初以文學侍從受知及官秋官益精研
律意體察情狀往往從糾結疑互處反覆別白不惜數千百
言析而出之同官老於刑名者弗能難也在部一年以律載
登時殺死姦夫及格殺拒捕罪人暨臨時殺死竊刦之盜得
勿論而其移埋棄屍者有司反舉殘毀人屍及棄水中律坐
以杖流本小末大失輕重倫請嗣後移棄律得勿論盜賊之
屍及姦所登時殺死姦夫並一切格殺持杖拒捕之罪人等
案又親屬殺姦罪視本夫加一等蓋指罪人未嘗拒捕格鬪
而言若有拒格皆當以拒捕論乃各省或引擅殺鬪殺或直
以謀故分擬使殺拒捕反重於不拒捕者援引舛錯請將親
屬殺姦非登時者用罪人不拒捕而擅殺律其拒捕者用罪
人拒捕格殺律條以入奏皆得 旨允行尋奉 命視學浙

江端士習清訟源飭諸生以半年習一經而責其成於校官
矯揉刮摩士習蒸變已又以陳大綬理學名臣而紹興志誣
以貪酷毛一鷺名麗逆案而遂安志侈其治蹟移書巡撫悉
令次第釐正十月貴州威靈州知州劉標以銅廠虧帑聞
上命公偕湖廣總督吳公達善內閣學士富察公善往訊計
虧帑二十九萬三千餘兩並得大吏苞苴狀奏論如律次年
獄定將旋京復命而古州香要事起香要黨堆寨苗人力
扼虎詔有邪術鎗礮弗能傷為諸苗所憚又有他寨苗人老
勇老九及女苗迫根羽翼之二十一寨為所誘將襲下江同
知龔學海遣人偵其狀香要殺之學海告變公因偕吳公及
巡撫宮公兆麟檄黔省各營會勦又以古州壤接湖南廣西
移知各督撫分兵守隘口而自以五月十八日馳赴古州二

十日署總兵程國相破烏牛香要退據佳居寨二十二日公
至下江營督國相攻佳居破之擒迫根五月二日公渡都江
次日抵加溜自烏牛至佳居八十里烏道旋繞峻狹纔容一
騎加溜尤險絕為佳居諸寨苗來往必經遂飭副將來永增
守其地且策之曰賊苗脅從者眾急則并力阻險勢不能以
旦夕平宜多懸木榜諭以天朝止誅首亂餘無所問其黨
必疑且散吳公等從之苗聞日持牛酒詣軍門公悉慰諭遣
去眾心大定明日督兵入朋諭大箐獲香要妻妾子女及老
勇老九香要獨身跳去山深箐密計不可猝獲乃令撤兵旋
占州以懈志而密使人偕生番老雄等伺香要所至六月
八日擒之烏招與其黨皆磔死事平
上下部優敘既還朝奏苗境多稻田產米利官采買丹江

兵米皆用實運則苗失賣米之利官多輸輓之苦且黔思尺皆山運一石價與買等是以一易二也宜改折請自平越始上從之辛卯雲南龍陵有逃卒四十八人就獲巡撫謂伊犁例逃者枷一月今龍陵邊地宜請正法公謂用法過重恐後遂為例會 召見因言懼法者眾情可憫且戮於獲所邊兵何由知不如械至龍陵倍其罰枷三月足以示儆

上亦從之傳 旨馳赦蓋

上知公持法平生殺悉當於理故生平所言多施行者公和平坦白不立崖岸不設城府獎勵寒素有一長必為拂拭惟引士以此歸之為詩仿李太白為文疎通明絕去雕飾有茶山詩文集二十八卷書法蘇文忠公畫出入於元黃子之王叔明諸家奉 敕進 御之作

上親為題詠者至數十軸蓋世得其書畫如圭璧然性篤孝先時視學浙中迎父蕭山公於使署雖便溺必親視之及王辰奔喪歸里不及含殮時時辨踊哀慟夙有消疾因以增劇至十月而卒時年五十有三公家世仕宦曾祖某祖某官福建惠安縣知縣父人麟以舉人歷官蕭山縣知縣皆因公貴 贈資政大夫刑部侍郎妣皆 贈二品夫人配金氏子二長卽中銑次中珏候補中書科中書女孟鈿適陝西乾州知州崔龍見是歲十一月葬公於懷南鄉白蕩之新阡昶以甲戌會試出公門下承中銑請爰據狀志敬為銘曰 惟古救法世重世輕罔或干正在允而明蠻夷猾夏師乃震驚亦惟司寇克詰戎兵後乃岐之匪古所程公之降世含譽景星公之述作韶護咸誥公之盛德騶虞祥鵬志廉而節器

高以閔解巾入仕天衢始亨暨登卿貳明良載賡從容 鼇
禁爲時典型計公所歷以兵繼刑議獄緩死討叛徂征深叢
絕嶂馳颺掃霆功不數旬剪其鯢鯨歸告成命羅施永寧
天子曰俞子氓汝生錫之優敘庸昭汝能何期奄忽騎箕以
行諡在 冊府文在 賜塋懷南之阡雲輝日瑩過而式者
砥此貞銘

工部右侍郎阿君神道碑銘

乾隆四十六年河決儀封之青龍岡河道總督等堵築不克
歲事

天子命大學士誠謀英勇阿公往督之又使君之子阿君具
玉幣函 制詞思 昭格於河神既乃屢塞屢潰

天子曰嗟惟河盈 毓萬有道路負遠弗溯源而祀之奚以表

誠恪迓靈祐復使君往君出西寧旋回部境踰星宿海得真
河源祈之而儀封決口尋就塞於是

天子嘉君由上駟院副都統擢工部侍郎蓋駸駸嚮用矣踰
三年而病病一年而歿世以此多惜之君章佳氏名阿彌達
字 祖諡文勤諱阿克敦父卽英勇公家世具詳余撰文
勤公行狀乾隆三十六年授藍翎侍衛旋因他事落職三十
八年授拜唐阿復授藍翎侍衛在 乾清門行走三十九年
放三等侍衛四十一年放二等侍衛四十八年放頭等侍衛
歷陞以至今官君久典宿衛

天子巡幸所至無弗從逮大獄視大臣疾必以使而進香泰
山及在熱河監視回人求雨以君誠懇故奉使獨多君生長
貴族雅志節儉襍被如寒素謙退若不勝者精勤恭慎奉職

春融堂集卷五十二
歷二十年無適舉 乾清門侍衛多勳戚子弟熹以衣服與馬誇炫暇則聲色飲博遊戲相徵逐而君沈靜恬雅寡言笑入直衆方喧啾拉雜輒以書史自隨蓋奉英勇公之訓亦生平誠懇自然也君求河源既抵星宿海未以爲是也見其西有水名阿勒坦郭勒色黃廻旋三百里入於星宿海自是合流至貴德堡始名黃河而阿勒坦郭勒又西石壁高數丈名阿勒坦噶達素齊老壁赤色上有池池中泉百道噴涌作金色入於阿勒坦郭勒乃真河源蒙古謂阿勒坦黃金郭勒河也噶達素謂北極星齊老石也於是用定南針正其方位具圖說歸報

天子命四庫館纂修河源紀畧昭示來許蓋元都實未踰星宿海而西康熙中葉之使亦以回部未靖僅止於都實所

之地及是而列史之所謂河源者乃定且自告祭後十餘年河南無昏墊憂厥功爲鉅今者懸諸 宸翰載諸 國史張騫都實有餘榮焉雖未中壽可無憾也已君生乾隆九年六月某日歿於五十六年五月某日配關氏例封夫人子一那彥寶今亡 乾清門侍衛歿時以方向未利五十七年三月某日始克葬於某里之新阡求撰碑文用樹神道爰書其事迹且綴銘焉銘曰

韋平家少執戟尋源往窮荒磧源既探薦玉帛援神契芟薪

帝曰俞志簡冊生勞勩歿舄奕示豐碑永嘉續
兵部尙書都察院右都御史湖廣總督贈太子太保
畢公神道碑

嘉慶二年七月兵部尙書都察院右都御史湖廣總督畢公卒於湖南辰州遺疏上

聖心軫悼 晉贈太子太保應得恤典令部察例具奏又命嫡長孫畢蘭慶世襲輕車都尉次子畢嵩珠給與蔭生等蘭慶等奉喪歸吳中而禮臣議請撰文 諭祭文有性行純良才能稱職鞠躬盡瘁卹死報功之褒於是 恩禮優隆哀榮備至蘭慶等擇以三年三月十八日大葬於吳縣上沙之新阡既請少詹事錢君大昕志於幽窆復屬剌以隧道之文公名沅字纓蘅一字秋帆曾祖諱祖泰由休寧遷太倉嗣太倉分縣鎮洋遂爲縣人祖諱禮父諱鏞咸以惇德篤行重於鄉閭三代歷次邀 恩封贈皆如公官公少孤資性穎悟六歲母張太夫人授以毛詩離騷過日成誦十歲明聲韻十五

能詩從長洲沈宗伯德潛惠徵君棟游學業益深邃二十二年北行寓保陽總督方敏恪公有國士之目乾隆十八年順天鄉試中式又二年補內閣中書直軍機處大學士富察文忠公戶部尙書汪文端公皆以公輔期之二十五年成進士以一甲第一人及第授翰林院修撰二十九年擢左中允明年陞翰林院侍讀充 日講官起居注教習庶吉士三十一年充會試同考官尋轉左庶子

上知公可大用特授甘肅鞏秦階道旋調安肅道三十二年奉 旨授陝西按察司使時 翠華東幸覲於 行在上詢甘肅亢旱情形據實陳奏有 旨諭督臣加意賑恤並豁免通省積欠四百萬十月擢陝西布政使十二月護巡撫印務時征四川大小金川京營及各省之兵先後入蜀取道

潼關及南北棧公調運糧餉夫驟撥解軍火器械安設臺站
源源協應民間一無紛擾三十八年五月河洛渭三水並漲
朝邑被衝分別賑恤全活甚衆十二月授陝西巡撫三十九
年春旱虔禱於太白山遣官取水靈湫雨立應請旨加封
昭靈普潤太白山神又勘西安八旗馬廠空地與平蓋屋
扶風武功四縣者四百八十餘頃悉募民開墾歲納租賦爲
八旂賞卹之需重修華嶽廟暨漢唐以來名蹟又以秦中碑
版最多萃而置之府學俾毋散佚濬涇陽龍洞渠灌溉民田
并墾提標五營牧廠地一百七十餘頃歸於實用是時陝西
鄉試嘉峪關外鎮西廸化府州士子雲集請照雲貴之例毋
論鄉會試每人給予驛馬元聖周公墓在咸陽縣北畢原有
姬姓奉祀生一人援曲阜東野氏之例置五經博士一員請

世襲并奉文武成康四王陵祀報可是年十二月丁張太夫
人憂回籍明年十月陝西巡撫員缺奉旨畢沅前在西安
最久熟悉情形且守制將屆一年着前往署理十一月抵西
安四十六年甘肅河州番回相仇殺傷及蘭州知府副將聞
警卽屬提督馬彪西安將軍伍彌泰等統滿漢兵往擊討之
繼聞陷河州逼蘭州府城又檄延綏興安二鎮一由固原平
涼一由畧陽鞏秦分道並入適

上命大學士章嘉文成公督勦感之化林坪賊遂平四十九
年四月甘肅平涼番回復亂由靖遠渡河破通渭掠靜寧及
隆德莊浪盤踞底店石峯堡公先調滿漢三千五百名赴勦
并請發京營勁旅

上仍命文成公偕富察文襄公領健銳火器兩營兵進勦公

告以當先廓清底店則石峯堡勢孤無援可立奏功文襄公如其言番回窮感乞命械赴京師先是西安省城日久頽圯陔剝公謂關中天府係伊犁回部西藏各外藩朝貢所經請帑興修逮三年而工畢并修潼關城堞鞏固崇隆迥踰於舊五十年正月進京 陛見調河南巡撫豫省頻旱又水溢沿河田舍被淹公請截漕二十萬石平市價以濟民食未完錢糧倉穀請全豁免且分別加賑展賑奉 旨所思周到調汝可謂得人如此盡心民莫或邀天祐朕爲彼一方民慰幸也并增給三十萬石以賑之十月會同文成公勘驗高家寨挑水壩各工訖事赴桐柏山尋訪淮源具圖覆奏蒙 賜 御製淮源記五十二年六月河決睢州督率司道往來搶護會文成公亦至於河分濬處斜築挑壩逼濬歸河五十三年河

北懷慶二府雨稀麥收薄遵 旨撥運麥穀十萬石減價平糶又令常平社倉各米不拘常例糶借兼行民食賴以充又疏濬衛源之百泉懷慶之丹河九道堰及近太行山向有泉源者俾夫以工受直而田亦皆收灌溉之利時夏秋多雨漢江及洞庭鄱陽諸水俱驟漲出江以截江流故江水亦騰踴決荊州堤潰城而入奉 旨授湖廣總督兼署湖北巡撫發銀一百萬兩爲工賑之用八月抵荊州同文成公勘潰決緣由蓋因江自松滋而下至荊州萬成堤折而東北北流本窄又有窖金洲沙長數里以障其南兼之盛漲無所宣洩直注堤根潰決實由於此乃盡剗洲旁蘆葦於對岸楊林洲斜築土壩並築雞嘴石壩逼濬南趨以刷洲沙無致壅遏而北於是城堤皆足保護矣又請修城中文武衙署兵民房屋并請

賑被災戶口其外二十九州縣之同淹者分別輕重確勘撫
卹窮民均令赴工力作以資代賑奏入皆奉 旨嘉獎五十
四年三月勘襄陽老龍堤添築挑溜石壩九月又勘估常德
石櫃堤工明年奏修復潛江仙人堤條議銅運過境章程一
銅船宜雇募堅固二銅斤宜過秤足數三險灘宜預趨避四
水摸工價宜酌水勢加添五防範水摸偷竊又勘四川至湖
北江中各灘由險改平者十二由平改險者六新增險灘五
雲南銅運始獲安行先是湖北數年前上下汰侈贖賂賂吏
治廢弛些窳而民風日益兇悍 旨令嚴緝盜賊嚴刁訟清庶獄年餘審結大小
上故以整頓屬公公緝盜賊嚴刁訟清庶獄年餘審結大小
一千五百餘案而遠界秦蜀者奸宄尙未盡除五十九年八
月陝西之安康四川之大寧邪教起皆稱傳教由湖北公馳

赴襄鄖訊辦有 旨降補山東巡撫是秋河南衛沁二河水
溢及山東沿河州縣奉 旨加兩倍賑恤公請將本年漕米
蠲免復遴員分赴豐收處按價糴買運至災屬存貯備明年
春夏間平糶之用奉 旨此番可謂用力六十年正月仍授
湖廣總督卽赴新任時先有 恩旨以明年歸政各省民欠
銀穀令督撫查數奏請豁免公臨去任將山東積欠四百八
十七萬常社米穀五十萬四千餘石悉奏蠲之不肯遷延諉
謝也二月次襄城聞貴州銅仁苗民石柳鄧湖南永綏苗民
石三保等四出鈔掠馳赴常德奉 旨令駐荆常適中之地
爲後路應援是時乾州鳳凰廳諸處盡爲賊藪且圍永綏雲
貴及湖廣官兵分駐鎮筵轉餉甚急公令長沙岳陽常德澧
州荊門州各屬先儘常社兩倉存穀刻期碾運由辰州轉解

軍營且令雇船從朗江以達五溪較用夫背負爲便而辰谿崖門砦以上多苗寨派文武能事者駐兵防護運道始爲周密其辰州以上逃徙各商給予口食安置鄰近苗寨州縣團練鄉勇協力堵防北省之鶴峯來鳳宣恩各隘口添兵分駐兼爲保靖後路聲援連奉 溫旨褒美旋抵辰州檄鎮筵鎮駐兵瀘溪搜捕宜昌鎮兵由保靖直向永綏熟苗有被脅者准其自首示以若先効順候事平分給逆苗田產又賞給銀布米糧以散其黨繼聞永綏圍解卽在花園隆圍一路安設臺站六省之師每日供支數萬迅速周詳

上聞而益嘉之自三月至八月乾州苗民五百餘寨先後詣辰乞降公便坐傳見不設兵衛導以 朝廷威德勉令自新羣苗涕泣叩頭去迄無一反側者嘉慶元年湖北賊起詭稱白蓮教宜都長陽各聚數千人爲應公赴枝江調兵搜勦連破蕭家巖栗子山各寨擒斬千餘賊竄山北而宜昌別有賊數千分擾遠安東湖當陽復調河南南陽陝西興漢二鎮兵往援未至當陽陷隨統官兵募鄉勇與前護軍統領舒亮進圍之殲其外援三千人斬僞帥楊啟元等七月破城因奏當陽善後六事一編審民戶二分撥營兵三裁撤鄉勇四賑卹良民五旌獎忠節六修建城垣其他儲備徵發供支策應遠近紆籌鬚鬢爲之頓白又委員攜銀米分赴村莊安撫難民免使賊誘奏入奉 旨此計是正宜如此又奉 旨畢沅前此勦洗當陽肅清縣治著有勞績不可不加懋賞着賞給輕車都尉世職用昭優獎其冬賊在宜都宜昌者將竄陝蜀上發京營健銳火器兵二千山東直隸兵二千來合勦公旣

奏調山陝馬二千匹又令人赴邊買三千餘匹解送大營濟
用時賊勢蔓延而乾州已復因密奏逆苗石三保等就擒石
柳鄧雖在旦晚可獲以十萬之衆駐守環攻苗人見有重兵
生計無資賊首反得從中煽誘不若乘其窮感予以自新而
於四面要路派兵防守且就降苗內擇其趨捷者以苗攻苗
不至再煩兵力撤出官兵併勦襄鄖宜昌諸賊自可即日掃
除

上下其章於軍中皆以爲宜十二月官兵破平隴斬石柳鄧
復擒吳廷義等於是將軍明亮酌撤官兵前赴達州宜昌軍
耳大振明年公遵 旨留駐辰州綜攬南北諸軍事羽檄紛
心規手畫久歷蠻荒炎天瘴毒積勞成疾初患眩暈手足
仁繼瘍生於背病聞降 旨慰問 命以安心調攝 賜

丹藥而已莫能療矣七月初三日卒於官舍年六十有八
公配汪氏 誥贈一品夫人早卒終身不復娶長子念曾亦
完歿孫二蘭慶芝祥次子嵩珠鄂珠曾孫二永滋景緒俱幼
女四一適陳暲一字秦耀曾一字衍聖公孔慶鎔一未字公
自傑直 內廷習於朝章國政少爲裘文達公所知會試出
蔣文恪公門下明通闊達兼有兩公之長出仕西陲時拓地
二萬餘里名臣宿將來往邊徼皆與之上下諏諮且掌新疆
經費局行軍轉餉諸利弊贊弗熟悉故四川陝西湖廣軍務
頻仍而公兼權熟計經理裕如自以文學經濟上結
主知不肯有所附麗旌節所至盡心 國事勤求民隱至於
二十六年蓋歷省總督巡撫中未有如是專且久者公每人
觀輒 命在南書房和詩備顧問所進古器物 御製詩

文紀之又撰進關中勝蹟圖志 詔錄入四庫全書

太上皇帝授寶歸政恭進典註一篇典雅得體賞賚優渥前後所 賜 御筆繡蟒詩扇扳指荷包諸物不可勝紀天性孝友迎張太夫人至西安官署先意承歡靡間晨夕及丁憂回籍適

上南巡迎 鑿詢及家事奏承母氏教養始得成立

上嘉歎賜經訓克家額以褒之友愛二弟始終弗替聞不足輟俸以濟督教諸姪鄉試中式者三人由諸生拔貢者一人嘗謂爲政貴識大體治尙寧靜故洞悉屬員賢否而不以機智鉤距不爲科條繳繞望之溫然無內外大小皆馭之以恩人服其寬樂爲之用篤於朋舊愛才下士老友如中書吳泰來侍讀嚴長明編修程晉芳諸人招致幕府流連文酒名流

翁集望若登仙侍讀邵晉涵編修洪亮吉山東兗沂道孫星衍咸以博學工文前後受知門下情誼周摯其餘藉獎借以成名者甚衆少嗜著述至老不輟所撰續資治通鑑史籍攷並靈巖山人詩文集又關中中州山東金石記河間書畫錄共若干卷每遇古書善本校而錄之若山海經夏小正說文解字舊音釋名疏證三輔黃圖太康地志王隱地道志晉書地理志新補正道德經攷異又若干卷時賢皆奉爲祕寶公仕宦日久太倉舊宅傾圯丁憂時移居蘇州又於靈巖山建御書閣以奉 賜書故自號靈巖山人晚年得山後陸氏水木明瑟廢園將葺爲退老計未果今蘭慶等卜宅兆於此亦公之志也夫昶與公鄉試同年同直軍機處又爲西安按察使知公行事爲詳庸敢掇其關於軍國之大者勒諸貞石

以示後世餘已載少詹事之志故不備書銘曰
保釐之德綿於南方文昌華蓋錫羨垂光始以文學馳譽巖
廊繼以勳業播績封疆經文緯武用綏戎行仁扇嵩華澤覃
湖湘苗民逆命兼患欃槍爰親旗鼓爰時餼糧速彼羣醜卽
我錄斯潢池未殄星隕其芒九重嗟悼昭示旗常聿晉公
孤聿賜綸章卜茲吉兆上沙之陽水木明瑟冠於江鄉左
鄰靈巖宸翰所藏星輝霞煥下麗重岡公騎箕尾誅蕩翽
翔恩榮百世雲初之慶

春融堂集卷五十一終

